



ル 5
3048
11



門ル 6
號 3001
卷 11

門ル 6
號 2301
卷 11

門ル 5
號 3048
卷 11

崑新兩縣續修合志卷二十五

政績

朱日新號中齋本楊氏子幼育朱清家因冒其姓未冠授
海運千戶累遷宣武將軍婺州路總管居官廉敏數平
反冤獄歲歉出已粟以賑民思之為刻石頌德遷江州
路總管亦以清聞

明

盧熙字公暨以薦授睢州同知明年行知府事適御史奉
命搜舊軍睢民濫入伍者千人檄熙追送熙令民自實
得嘗隸尺籍者數人昇之御史怒繫曹吏必盡得不則

昭和九年
六月十八日
碑

以格詔論同官皆懼熙曰吾民牧也民散安用牧乃自
詣御史曰州軍籍盡此矣迫之民且散獨有同知在耳
請以充役御史怒斥去堅立不動已知不能奪乃罷去
後卒於官貧不能喪官爲具殮喪歸吏民挽哭者塞道
大雨無一人卻者明史熙爲人雅飭信厚博涉經史亦善
筆札其在官時兄熊嘗遺以詩曰藿鹽清夢穩鐵石古
心存人以爲不愧云子充穎字次農工詩文書法顏柳
兼精篆隸而制行尤高以能書薦給事誥勅將官之會
世父熊死抱骨歸葬誓不復仕子儒
趙彥可洪武初爲臨清知縣公勤寡欲好士愛民民戴之
如父母初丞山陽嘗公出妻潛受賄既知首賄於府拏

其妻而遣之歷仕鞏昌知府

王震字子東宋參政絢九世孫父祖卿洪武初爲行人開
雲南路夷山堙谷設施爲多震應秀才舉除益都令歲
大稔民採靡蕪爲食震開倉賑之吏以未受旨非例震
訶之曰民饑如此而候旨死我民矣陞益州同知僧寺
有佛像能言人禍福遠近祈祀不絕震至攜酒饌往與
轟飲良久命左右取醉狐來吏視草中果有巨狐酣睡
震命縛之柱狐醒丐命震顧吏曰左道惑衆於律云何
狐哀懇曰法雖然狐未嘗害物乃命釋之像不復言
趙遠字宏仲永樂初以楷書稱旨授臨朐縣丞廉勤稱職
擢禮部主事時廷議置倉徐州備緩急遠董其役遠

覈勤惰而勸率之不期年竣工超拜河間知府卒於官

遺橐蕭然不能具舟車州人歛貲送歸葬馬鞍山北麓

子昂字叔昭宣德元年舉鄉薦官輝縣教諭亦以廉稱

孫成美鄞縣訓導本張大復傳成美科名無考

張準字士平永樂中以賢良薦授建安知縣有惠利民懷

思不忘明史

許剛字秉中永樂中貢士通判鈞州廉勤敏惠所居無赫

赫名而州人懷之內艱歸州人製土瓶以獻曰磁鈞產

也自侯來此而民不苦磁請以此為侯壽服闋補霸州

政如鈞黃雲作寶廉瓶文以記之孫立字伯基舉宏治

己未進士授山東海豐令藩府請牧地自益立召其民

以所請地定額如制擢御史以侃直出為吉安推官雪

一家父子八人寃獄遷漳州府同知致仕

陸塤字孟和本崑山人父德賢以間右實京師損入江寧

府庠永樂中以能書選入內閣預纂修事竣授湖廣新

寧令邑雜獠徭向稱難治塤順其欲不擾以事歷三考

政最增秩家居宣德戊申薦拜左軍都督府經歷以勤

敏著賜誥褒美雲南車里交惡命塤往諭皆改謝使還

復齋金符冊其酋長陞長蘆運司副使致仕歸崑山

盛頤字養蒙其先大梁人高祖德肆官蘇湖撫諭始居崑

山之高墟頤三歲而孤事母以孝聞長從鄉先生受詩

通大義尤工詩律善真行書法永樂十七年詔求遺賢

守臣以頤應入見稱旨擢拜江西左布政使至則清理
逋賦決遣滯囚凡有設施必簡大僚之廉勤者畀之而
已總其成剛柔緩急悉協機宜先是江西鄉試暫寄學
宮多奸弊庚子當大比頤擇南城敞地營建貢院嚴飭
關防得人稱盛乙巳入覲陪祀南郊特加寵賚爲忌者
所中落職宣德初起南京工部員外郎三使藩府皆著
廉能譽疾卒南京曾孫洪

陳皞字孟東先世浙之奉化人元有名紹參者爲崑山州
學正因家焉少孤貧習法律算數之學永樂初邑宰芮
翀選爲吏常以夜學春秋於林鐘學詩於偶桓久之悉
能領會群經要旨通政趙居任來治水一見異之曰儒

生也他日必爲良吏檄與偕事者二年入都從豐城侯
平交趾以年勞授會稽知縣會稽民頑獷不就徭役皞
至申教條明法令不一月翕然向化三年上計會詔求
賢力薦同縣河南僉事呂旦清操旦起用論者躓之改
知瀋安政如會稽及歸不能自給皞處之怡然鄭文康
銘其墓深歎其剛介云從子助

夏遂字存良祖友諒八歲能詩十九而卒遺腹子元卽遂
之父遂穎異絕倫十歲補增廣生十九領正統三年鄉
薦明年成進士予告歸娶授禮部主客司主事時遠人
朝貢賞賚旁午皆倚辦本司遂氣度脩遠瞻對豁如北
送瓦刺南護瓜哇所至無驛騷十三年奉使遼陽陞賞

有功將士稱職尙書胡濙重之以疾歸未至一舍許聞母病遂卒年三十三兄佑字存賢宣德中以儒士授臨海縣丞胡濙薦入禮部鑄印局遷福建廣實倉大使性爽豁喜任事卒於官方兄弟同官京師時迎養母氏繪萱荆榮會圖名流題詠稱一時勝事

沈祥字應禎其先山東人高祖文度自太倉徙崑山祥登正統戊辰進士授刑部主事以平恕稱遷工部員外英宗以杭州袍服不如法且後期詔逮局匠赴部議罪祥抗言於尙書曰造作違法罪在所司諸工匠皆貧人纍繫觸暑就道死亡必多公爲大臣宜爲朝廷惜百姓出稿懷中立堂下不退尙書爲具奏事得寢遷四川參議

督建昌六衛糧儲特以嚴密積弊肅清移疾歸與故人流連觴詠爲樂生平疾惡最嚴里中有不檢者聞其聲歎卽避去家居二十餘年年八十一卒子時字元中成化丁未進士初授餘干知縣後知泰和所至善政異舉積弊爲之一清泰和邑志稱其剛直不撓勢豪歛戢善人得安云孫信字循初宏治丙辰進士

孫宗字公武其先長洲陸氏宗幼爲崑山孫道庠繼子遂冒其姓景泰間以貢知懷柔縣調湘潭湘民怠於本業宗親行勸課之市廛失火勢不可爲再拜籲天火尋滅凡讞獄救荒征賦力役之事皆簡當有法祭酒劉崇時以藩寮按部特書廉勤二字旌之子瓊

黃琳字廷耀景泰癸酉舉人歷官至河東鹽運司運同鹽池在中條山北設東西中三分司琳鈎稽有法人不能欺奸商猾吏懲治畧盡奏浚鹽池二歲增課十餘萬官商便之

錢用字尚賓世居邑之支巷少能文邑令羅永年奇之爲命名且字之天順七年以貢授三河教諭改江西樂安旌勤警惰多所造就歲大旱民艱食用白御史發廩賑之有張甲者諸姪利其貲誣以死罪用白於縣令王景景悟置不問歲餘甲生子名之以錢署宜黃縣事民皆悅服陞贛州府教授署府事永豐羅倫手書履素二字贈之以母老乞歸

關雲字時望成化丙午舉人授餘干知縣政尚慈惠歿後祀名宦立循良世顯坊於餘干東關外曾孫之雄字學訥之雄子用勵字季貞並以孝行文章著用勵子選

國朝順治戊戌進士立身醇謹稱世德云

高以政字養民少孤鞠於祖成化丁酉領鄉薦又十年選上杭令會閩盜竊發黠吏借以羅織富民武平民賣羊於市誣以盜繫獄以政視籍無買羊者名姓立出之械陷者示於衆白沙里人溫文進聚衆稱亂以政督鄉兵設計擒之考績歸念祖年九十母亦七十餘遂致仕題所居曰宜晚自號歸田竭力孝養性溫和樂易無疾言遠色卒年九十三無子以趙氏甥爲後

馮琨字君美鉞子舉成化丙午鄉薦任永康教諭遷薊州知州勲戚貴璫奪民牧馬地爲莊園小民莫敢誰何琨按籍覈之盡還諸民勲貴怒誣奏琨逮下詔獄琨列主名幾何影占幾何爲孝宗分別言之上咨嗟良久卽令復職武宗卽位逆瑾用事再起前獄下錦衣衛兩訊杖八十械坊官所薊民挈榼餽餉不絕適有僧言於瑾曰馮知州惟飲薊一杯水非百姓愛而餉之死園土矣瑾愕然釋還薊州遷杭州同知再轉兩浙運副擢登州知府清操彌厲未二載棄官歸林居二十年年八十餘卒子夢龍字翔甫以歲薦任應天府訓導攝知六合縣半載遷潁上教諭山西吉州學正致仕老屋蕭然藜藿不

糝巡按甘士价縣令聶雲翰稱其清絕時加禮問

張寬字德宏注孫鑾子舉宏治乙丑進士授錢塘知縣縣附省奔走參摺口須秉燭方視事不以爲勞省賦輕調民大悅服江漲壞民田寬力請於上官發儲存活無算無賴觸嵯禁嘯聚爲亂寬下令撫定之卒以無擾定海有滯獄數年不決上官檄寬往一訊卽服徵拜刑部廣西司主事晉員外擢廣東僉事肅紀蒐敝悉有條次劇盜起寬督師擒其魁餘黨悉定以疾歸卒

龔震字敬修竹莊先生琚孫領宏治乙卯鄉薦通判漳州時王守仁平汀漳盧溪諸賊震領調兵食將士宿飽先登守仁將薦之會有條議忤御史調守武岡州武岡王

自新縣志卷之二十五
七
濠泗縱諸健奴不法藩府通州南門屠沽負販數受凌辱震一夕發卒百餘塞南門別穿便門通往來諸奴震懼王亦不敢問無何疾卒

徐懋字德美宏治甲子舉人授德安府通判府額設壽藩祿米萬石千戶所屯米若干懋申革宿弊支放以時漢沔多盜懋爲開塹築堡水陸寧靜民歌頌之進吉安府同知清解軍伍考校生童皆以嚴正得人心自吉歸舟臥或螺山石以行云

秦雷字起潛孝友淳謹精易理發明聖人開物成務之意爲學者所宗宏治甲子領鄉薦授元氏知縣歲大饑減耗革弊政在惠民告歸環堵蕭然常不自給元氏民肖

像尸祝之

周震字世亨百十六歲壽誼六世孫正德辛未進士授鄆陽知縣姚源賊起震協勦有功時屬邑近姚源者得蠲租獨鄆陽不與震以鄙去姚源雖遠而以餉援故民實不勝勞疲力請得如例公暇與諸生講經課業治聲大著擢監察御史疏論豫儲廣孝懋學勤治選將練士信賞必罰八事清軍福建會黜卒煽亂計擒首惡數人撫定餘黨奏裁鎮守中官歲侵鹽利數千金庚辰還朝會武廟南巡詔視斬逆濠有銀牌之賜辛巳巡按河南尋遷浙江僉事轉廣東參議以不能逢迎罷歸

沈大楠字景明濤子嘉靖癸未進士授東明知縣邑介三

省爲逋逃藪大楠立禁令明教化表先賢冉子墓清豪
民隱匿田考最陞南京刑部主事調吏部遷郎中擢延
平知府祀七賢十孝子九節婦以厲民風募役鑿黠澹
灘石以利行舟尤溪界漳泉萬山中多寇盜倡議設大
田縣親督其役費不煩而事集調福州府出繫囚省郵
傳罷通海市忤權貴調官需次補知惠州府適子紹慶
成庚戌進士遂棄官歸築留餘草堂吟嘯以老紹慶字
子善以嘉靖癸卯順天試第一登第授鄱陽合理夙滯
鋤豪猾罷衙前支應父服闋補光山均徭平賦除虛糧
數千石擢禮部主事遷員外督學雲南乞養歸卒紹慶
孫應明字鳴熙由吳縣籍登天啟壬戌進士歷官兵部

郎中左遷東昌推官移疾歸

陶文淵字靜夫其先自澱湖徙于墩文淵領正德己卯鄉
薦久不第選南京工部司務凡數年減浮費萬計吏不
勝察覈以事中之出爲興化檢校遷連城知縣連方有
海寇文淵繕城築堡厲兵寬徭寇不至邑人愛而祠之
擢建寧府同知仍調知西華縣屬大水薄城文淵晝夜
雉堞間誓自沈以謝水水驟退績最當遷遽拂衣歸囊
橐蕭然自題其室曰定齋卒之日幾無以爲殮云

王燭字仲美元巡防千戶宗慶五世孫幼補諸生嘉靖癸
未以弱冠成進士授行人奉使魯藩峻郤餽遺遷刑部
員外累官南京太常卿署國子祭酒事士慶得師就遷

大理寺卿執法平允告歸卒年七十三煥體癯氣清德器深厚居家時振贍宗黨好行其德鄉里稱之

尤敷字尚虞本姓王以高祖贅外家遂襲其姓敷與中表兄弟張情張意自少以學行相磨切嘉靖壬午舉鄉試授湖廣宜春知縣改福建詔安銅山千戶運軍餉被劫諸縣多逮繫無辜敷設法捕得正犯九人追取失金餘皆獲釋縣吏錙一元赴京經行白葉峒爲賊所殺敷募驍勇推以腹心不數日卽獲真盜御史徐某雅知敷悉以疑獄委之多所平反會監司以刻核繩下八閩州縣吏坐事者十九人敷亦解官歸弟徹字尚周早歲能文清謹如其兄時稱二九以歲貢終

顧邦石字孔安恂之孫父式字正夫通曉世務成化中夏潦院檄勸殷戶捐賑式詣臺言富者未必肯踴躍恐就斃之民忍死趨利爲害匪細惟通商可救目前因條陳便宜數十款事得寢積餼久之貢禮部親老不就選以新例授杭州經歷邦石舉正德癸酉鄉薦選授南昌迪判時兵變甫輯餘孽洶洶鎮守中官交至苛索地方邦石繕甲補伍力爲調劑湖賊萬學一負險匿亡命出沒叵測率兵壯計擒之時郡守以下謁中貴人皆庭參邦石恥之自劾歸年七十卒

王三錫字汝懷任用從弟登嘉靖己丑進士授光州知州俗刁悍難治強宗豪族輒置耳目於守左右三錫至發

摘姦隱不少貸間至學宮與諸生講說一時經指授而後爲名臣者若劉繪喻時李時春其尤著也有吳道南者自他邑來充掾吏三錫一見試以文奇之延課諸子道南竟登第州人鄭坤以御史家居戚屬倚之縱暴鄉里三錫悉捕治之還所侵民田十餘頃坤銜之媒孽於直指王儀罷其官時年未三十坤死光人爲立生祠於城北祀之三錫性坦直無城府父時暘歿時遺貲頗厚悉以讓諸弟曰吾將以是慰吾親地下也卒年七十孫雲字從龍嘉靖己丑進士授刑部主事進員外郎御史馮恩因星變疏劾都御史汪鋐并及大學士張孚敬方獻夫帝大怒逮下錦衣獄移刑部欲致之死雲抗言曰

御史得風聞言事又以星孛應詔何罪卽毀譽過當法不當論死議減戍上帝愈怒謫雲朝陽典史調廣西懷遠遷增城知縣歷陞湖廣僉事福建參議部有礦賊爲亂雲親率兵勦平之擢江西副使引疾歸雲少有至性甫補諸生時父客死桂林雲徒步往得父骨於昭平堡函之以歸將渡江旋風忽起舟人得所函骨擲之江雲躍入江中攫得之泗行里許卒抱函骨歸葬

王三接字汝康三錫弟嘉靖乙未成進士授長垣知縣屢白疑獄有能聲以裁抑鄰邑憲長厚息責民憲長乘大計欲黜之吏部尙書許瓚不可調浙之景寧中官緹帥奉命開礦三接欲止之旣開無所得名益著遷南禮部

主事歷員外郎中出知柳州府巡撫張岳征馬平寇議置堡于蔓村調狼兵雜他種守之三接謂狼兵與土民雜處必不相安若戍以土著之種必不倍德岳善之以柳城北枕平野寇警首及闢舊址更築之因力於兵因工於餉民不知役柳人賴焉調知澂江遷河東部轉運使免歸三接性謙抑然諾必信久之卒年八十一

周之甫字岳生鴻臚丞大倫子以諸生入太學授福建松溪縣丞松溪田多蕪不治乃捐俸募民墾藝并勸大姓資以牛種稔則均收三年而荒土盡闢攝莆田篆凡不使於民與便民而未舉者殫力為之莆民德之以病乞歸都御史海瑞故與之甫善治水吳淞主之甫家與論

疏濬之要民安而事集及卒里人肖像尸祝之

潘德元字子懋其先汴人為宋潘美之裔南渡居崑山徙太倉後仍歸崑德元幼侍父京邸為順天諸生以春秋中嘉靖甲午鄉試一時治春秋者爭師之王錫爵其入室弟子也八困公車選商河縣令有土豪殺人誣陷士人子田明等立訊伏辜鄰邑海豐為颶風所湮巡撫檄德元往視請移商河陽信粟賑之後陽信饑又移海豐粟賑之全活甚眾陞承天府同知時景王就國修治宮室軍役生變廉得首亂置之法會同官以部糧缺額連署德元名於計牘左遷信陽知州其治信陽頗嚴或問故曰商河民瘠法宜寬信陽民多不逞吾其可以梁肉

治痼疾乎秋試兩充山東河南同考官報最擢應天府
治中會太倉以糧役誤入德元名當道論之拂衣歸德
元幼工詩文兼善書翰卒年六十六

秦雲字起和以監生授霍州判官山西旱饑命雲往賑河
東芮陸猗夏蒲解三十州縣借一武弁輦金行懷仁王
府在霍宗祿久缺使闖豎破鞘掩之雲曰王需祿米固
急奈何捍天子命饑三晉民卽天子問王何以處王慚
懼完鞘還之雲取錙列案上稱停裏紙按戶分給胥吏
一不涉手民歡呼更生州有荒田三千餘頃歲責逋賦
於里甲雲發倉粟千石貸里甲使耕收麥數千以償理
賦監司責以擅發倉粟而鈎考籍記甚明無以罪也調

夷陵州州多火災雲夢見秦白起乃建重樓肖武安君
像祀之火患遂息被檄往施州治獄施去江陵數千里
南出夜郎平時被檄者但以文牘塞責無至者雲獨馳
往有土司以百鎰金苞茗中雲卻之夜宿僧寺賦詩有
暗室如白晝之句都御史顧璘聞而賢之陞開建知縣
不赴歸

錢培枝字子充以諸生入太學授山西解州判官攝守篆
州民聶德政殺人事連張守政御史欲併坐之培枝爭
之曰德政自殺人耳奈何復以一生者抵御史誦而止
河東地夜震蕩解字且盡獄暴火囚數十百俱闌出培
枝令無救火而環吏卒以守囚比明囚無逸者乃發藏

穀糶粥食飢者庀錢布飭里甲俾有無相通分布丁壯捕治鄉落之不逞者餘以次招徠閱六晝夜乃定監司以州變遣指揮協守培枝曰是擾我州也判卽不肖敢以百口保不叛監司爲召還指揮外艱服闋補睢州睢枕河培枝春秋行隄上白服雜吏民中晝夜靡間終其任河不決遷慶王府審理正卒年七十三

王繼孝字子忠鑑曾孫嘉靖己酉舉人授龍南知縣縣居萬山中多賊巢繼孝至鑿險堤浸擒妖僧數十人遠近顧化時被憲檄視他縣事往來諸縣詢民疾苦與地形險易皆知之葉楷者故安縣弁據黃鄉作亂僭立功王廟奉其先春秋殺人以祭巡撫檄往諭之繼孝馳至黃

鄉楷知其爲廉能吏備賓主禮迎問曰君降楷耶安之也繼孝笑曰此來自有處置因密諭諸脅從者以歸誠之利衆心稍懈乃伏兵龍南自提兵猝臨賊賊躍馬馳斷其馬足又斬巨魁三四人賊窘甚自焚死加知府銜調繁寧都爲忌者所論免歸子元圭元貞元芳並諸生龔起鳳字瑞周從父瑾以貢授曲江諸縣有清廉名起鳳以太倉籍舉嘉靖戊午鄉試壬戌中乙榜授定州學正清強有守應河南聘爲考官以薦入爲大理司務寺卿王篆屬徵免役錢甚急起鳳弗與徵篆怒笞其隸起鳳亦笞篆役被劾謫嚴州教授遷杞縣知縣獄有囚三百人多冤者訊得遣之留十三人歸德府李豪殺人賄其

令脫死監司檄起鳳往訊令使吏持千金以進起鳳大怒以囊擲吏流血被面而去卒伏豪辜縣故有馬夫值金五百例入令起鳳貯庫供驛遞往來費俸薪所餘悉歸公帑御史某行縣銜其無所供坐以不及罷既歸居荒圃中課小學數人灌園自給園惟植韭人稱龔公韭年五十一卒無以為殮同年生浙江副使太倉張振之倡捐以殮且葬之新塘里同年生王錫爵誌其墓

許承周字公且隆慶初詔科場限字承周獨能馳騁於束縛之中與陳允升齊名戊辰成進士授蕭山知縣海水衝嚙民田承周築西江北海二塘役成而民不擾稱許公塘俗以嫁女多費生則溺之承周為定婚禮溺者連

坐遂變其俗長山諸里白骨彌望為義冢收瘞貧者子棺期年大治御史檄令掣鹽承周以非例辭御史曰非蕭令不可已而大賈果以千金為壽磨去之鄰邑僉事陳某官江西歸過蕭山用舁夫百許撈掠候吏至死承周上其狀於臺司陳造蜚語間之執政免官既歸日以將母為樂適故人為齏使有賈人持千金為太夫人壽令居間承周峻卻之曰吾為子孫計故不敢受年五十四卒蕭山人祀之名宦子旋吉獻吉觀吉觀吉字叔顛萬歷丙辰進士知湖之歸安縣縣多巨豪觀吉卻竿牘禁疆禦幾為黠者所螫母嬰疾署中就牀前隙地和衣處其上微聞呻吟聲即立起奉湯藥以進既而奉喪歸

里哀毀骨立服闋補河南臨潁縣綏民馭吏如令湖時
尋擢冬曹主政董修國學及督三殿工木甲子吳中大
水經營荒政民得沾恩論功優擢罔卿仍理水司正俄
而京師戒嚴縮司符僅十日以箭簾捍城事忤貴奄正
郎四人俱拜杖遂病創卒歸安臨潁兩地俱祠名宦孫
士紳字文舉天啟辛酉鄉舉以能文孝謹稱早卒

王炳璿字幼文同祖孫兄炳衡字伯欽工舉子業隆慶辛
未進士授歷城知縣調臨安愛民好士有古循吏風炳
璿幼與兄相師友登萬曆甲戌進士知上饒縣廉敏多
異政入爲刑部主事遷員外折獄平允出知德安府嘗
校士惟拔童子七人皆稚小語之曰德安待汝等而第
必勉之後七人者皆第竟無先之者以覲歸卒

王文昌字允慶隆慶庚午舉人謁選授開化令俗悍健訟
文昌至爲約法繩大猾以律編徭定賦輕重得宜政暇
則課諸生以文藝獎其能者而誘其不及者以罣誤左
遷湖廣按察司知事臬長李公及泉聞其賢命視武昌
稅廠事辦而民不擾分校秋闈稱得士直指疏其才擢
黃梅令先是劇盜起蘄黃間建僞號攻城邑勢張甚乘
除夜來燒縣驛縣故無城文昌扼險以守衣不解帶者
三閱月斬其渠四大嘛羅賊始定謂縣寶三楚門戶議
築城會歲饑大吏責贖緩文昌曰吾忍剝民以奉上耶
拂大吏意奪官歸既歸以詩文自娛久之卒所著有螺

訂稿奕世堂遺稿子三麟徵汝懋義敬俱諸生

支可大字有功世居黃潭里父良知以長厚稱可大登萬
歷甲戌進士授禮部主事歷員外郎郎中擢廣東提學
副使移疾歸起浙江提學歷江西參政應天府丞陞湖
廣巡撫播州楊應龍之亂總督李化龍分八道進兵可
大移鎮沅州降九服白泥諸寨連破黃岑高巖乾溪寶
兒圍遂入播七戰塘保破板房關三戰煉坪克苦菜關
播平蔭一子告歸小築城隅又十餘年卒年七十四
馬玉麟字德徵宋宣教郎友直裔孫舉萬歷丁丑進士聞
父夔州經歷龍光喪奔還先是玉麟祖邵武知事淮與
甫里族梟凍有郤至是龍光過其地為所螫病死玉麟

歸衰經踵都御史胡執禮門卒白兩世仇服闋授工部
主事視閩南吐巡視泉脈以時啟閉築高家堰坎河口
為漕運利賴內艱服除補故官權杭州南關稅遷員外
奉詔修卿雲宮中貴張進故大其事玉麟溫言諭之半
載竣事費祇三萬餘遷雲南參政甫三月罷歸嘗遊杭
州海上獲島夷千人將戮之然舟無寸鐵玉麟惻然語
布政史繼辰曰是殆因颶風至此乃釋歸玉麟子天駟
天駒天驥天騏天駮子雲舉字漢翔 國朝順治丁亥
進士河曲知縣天駒子鳴鸞天驥天騏鳴鸞俱別有傳
丁允亨字孟嘉嘉靖壬子舉人晚授太湖教諭縣令王大
謨請修縣志志無濫者陞臨漳知縣縣故有隄以禦漳

水歲久隄漚衝激城垣允亨請以故址築隄四十五里
高一丈二尺廣倍之用衛河事例豎椿橫枝用土搥實
其費則取之漳額歲辦河工解府銀民不煩擾漳人賴
焉未幾病卒御史周孔教資其喪歸士民爲之巷哭
周詩字與言年十九領嘉靖乙卯鄉薦選六合教諭邑少
文無登第者詩加意振作所拔士厲昌謨始聯捷遷知
江寧縣時應天府屬廩餼特薄詩白京兆請如他郡例
士皆感奮江葦故籍天界寺奸人窟穴其中爲清其額
歸之擢工部主事詔視泗陵爲隄其水之衝嚙者奉敕
視權蕪湖陞思州知府旋致仕卒年七十一
支如璋字德葵先世有名德者永樂初奉使西洋有功賜

籍太醫院祖貫太醫通判父三顧以貢官高苑教諭如
璋中萬曆丙子順天鄉試歸省墳墓仍居崑山選吳橋
教諭吳橋士鮮甲科如璋改葺學宮身爲訓教五年間
舉於鄉者八人登第二人遷國子學正陞南康同知署
府事鄱陽水溢捐俸賑饑活三萬人所隸倉廩盡塌而
米價方貴乃請以兵餉之在官者貸民俟其熟而償之
亟治庾舍踰月而竣凡酌幫量解通鹽開堰拯溺捕盜
諸事靡弗舉南昌奉新靖安之民嘗與安義爭堰而閼
如璋按界相視就近取便以新堰聽安義茂埠聽靖安
廬堰聽奉新民皆便之遷福建都轉運使分司閩關奸
民販私滯課如璋下賤司杜其徑竇順昌延平濱河處

窟穴一空嚴捕哨禁私牙通水客編桅船鹽政畢修卒
爲奸民所中罷歸奉後母白侍養備至以病瘵卒

顧允元字懋善贈少保恂元孫浙江布政司都事澡孫父
夢羽字舜祥少贅於金遭父喪悉推家產於伯氏由國
子生授四川鹽課副提舉擢蘄州同知攝州事以清操
著久之罷歸囊橐蕭然卒年七十八允元登萬曆丙戌
進士授甌寧知縣會大疫允元誠獄卒洗濯梏械埽園
土療以藥兼覓良醫行藥於市全活無算爲政持大體
婦孺皆得詣前陳訴地產鐵冶水灌田田盡緒允元疏
免其稅立開煎之禁民賴有秋俗溺女又蓄婢至老不
嫁皆設法禁之內艱歸卒允元天性敦篤父廉而好施

每假貸以應允元多曲償之嘗舉古人陰德猶耳鳴之
說以戒其子曰若有意求知去惡業無幾耳弟允諧字
懋孝萬曆壬午舉人授德安知縣妖僧挾符水攝人魂
捕獲鞭之百不動付獄鎖鈕皆脫乃以印遍印其體始
吐實焚其書磔以示衆邑民掘地得黃金巨萬中有金
兜鍪鐫劉基爵號姓氏僚屬皆睥睨允諧曰民獲之民
主之耳於吏何與取兜鍪貯庫中允諧才志高卓授經
宗黨率通籍去晚始出宰稱廉吏允元子天敘

顧紹夔字和甫濟之孫父樅字子繩以太倉籍受餼喜讀
書尤嗜周易早卒紹夔幼失怙恃撫於叔章志補太倉
諸生領萬曆戊子鄉薦選海州學正遷四川郫縣知縣

抵任刊戒諭數條首勸息訟有訟者必平情推鞠允其贖緩邑產巨篁諸司檄索如織民患苦之紹夔或裁或拒困少蘇時川中新罹播州之役戶口蕭條作四川歎紀事郵呈上官直指李某按蜀知紹夔公正密詢郡僚吏賢否尋特疏保薦以瘍疾遽卒子同文字字官諸生以耆德稱孫孝宏字宏之以貢授浙江泰順訓導攝邑篆時上官檄追緝紳優免及稅契助餉邑本無紳田賈亦微前令每橫征以當上官意孝宏乃列邑之大小分三等蠲租在應蠲例更爲衰益之法取公私兩便者條上之御史左光先善之檄所屬俱如議行浙之小邑得免加稅孝宏力也以親老乞歸子清晏

陸夢履字元禮母黃夢履濡墨池而生因名萬厯己丑成進士授刑部主事主甲午雲南試遷荊州知府潔身率屬頗嚴峻已而臺察無及所屬者人始服之覲畢過家父疾留侍六月而父歿有修郟者持之左遷山東運同至則覈課引追逋丁丈園畝清編戶鹽政一新遷知雷州府東人詣臺請留改東昌時方旱蝗河工復急夢履拊循安集歲不爲災尋遷沂州副使百姓又請留再改東昌兵備稅璫馬堂貪暴市民聚衆焚其廨擊殺其黨夢履條晰情形請撫按奏減東稅三之一而懲首亂一二人事遂定以兼攝三篆積勞卒於官東人立祠祀之顧謙服字民服鼎臣孫父履吉字仲修讀書孝友稱宗祭

酒謙服以貢選長興訓導改華亭拔陳子龍於童穉中
遷昌化知縣歲荒發五倉積穀手給貧民無冒濫開水
塘築壩以時蓄洩邑民方大清方增榮被誣坐死獄二
十年一旦訊釋之豪商呂某訟薛綬謙服不直呂別撫
他事訟綬賂要津郵書以屬謙服裂書管門者抵呂罪
縣西昱嶺關與徽州接界在亂山中爲盜藪謙服建議
於東西要害各設關禁止孤客單行需衆商集乃放關
添設兵壯申明地界以嚴責成其害乃除考滿陞馬湖
府同知致仕歸昌化民祀之學宮子咸建咸正咸受
王在公字孟夙炳璿子幼隨父官京師感痰疾發狂已而
以犀導自刺其喉幾二寸不死疾漸瘥父卒後折節讀

書萬歷甲午領鄉薦授高苑知縣善聽斷樂安有李甲
者經八訊皆論大辟願改讞高苑在公鞫得其寃白之
守出之歲大旱禱羣望手書疏達且不寐禱畢入郡雨
隨至獨邑四境霑足及經行臨淄二十里得雨遷濟南
府同知署府事投劾歸以俸餘寄贍三族賣宅分給兩
子抵吳門竟不過家至徑山遊天台又從廬山入蜀留
峨眉一載還吳悅太湖之石孟山結廬以居十餘年卒
卒之前竟薙髮爲僧服云

何琪枝字伯玉父道光與兄道貞友愛甚篤旣卒道貞教
植琪枝俾力學登萬歷辛丑進士由應天教授歷助教
陞刑部主事當提牢日必親視疾苦獄卒黃龍素虐囚

而取其財有以直言下獄者龍酷取如故聞琪枝將治之篋金珠營免琪枝白尚書以聞磔於市都人稱快將調吏部病卒琪枝性孝友事伯父如父弟天善成其婦之節與葉向高顧憲成劉宗周諸壽賢爲師友以名節相砥礪立朝風義卓然道貞子瑛枝孫永睦俱名諸生許伯衡字參之御史立元孫父騰蛟有文行伯衡中萬曆庚子鄉舉由雲和教諭遷曲陽知縣縣故磽礪伯衡遍詣鄉亭咨詢利病歲旱不雨出倉穀賤糶之而後聞於諸臺一切羨利洗革殆盡吏部尚書趙南星稱爲廉卓第一移晉宣知州議淘鹽井酌金價平丁役滇人賴之以最陞饒州同知告歸

方士騏字介甫太常鵬元孫家貧贅於陸尋走浙江補平湖諸生從祖銅仁知府範召之歸仍隸學宮弟子食餼郡庠久之領萬曆癸卯鄉薦授海鹽令疏滯剔蠹案無留牘廉知巡方刺訪之弊動至破家邑竟無糾舉者御史怒訶不爲動以內外艱歸民立祠祀之服闋補四川之中江中途以病返未幾卒士騏性廉潔宦成後家無縑帛出無車輿困約不異於前子國祥字仲旋天啟丁卯舉人由華亭教諭歷電白知縣肇慶同知擢瓊州知府有政聲永明王時知勢不可爲請告歸卒年六十九顧咸和字公節履方次子謙益之子以胄監授左軍都事遷後軍都督經歷掌參軍事府故居庸山海兩關要害

地參軍掌照驗出入故事罪人出關攜童稚未登籍者沒爲奴咸和爲備登其數使父子不至離散進順天府治中署尹丞事會省臣料理稅傳有所陳乞咸和謝却之中蜚語投劾歸卒年三十六子震宇字宇清萬曆乙酉舉人授滄州學正陞仙居知縣俗多溺女易妻班銀包攬諸惡習震宇力爲釐剔舊俗一新邑故無志震宇偕邑人修輯手纂成書調順德府經歷陞五臺知縣沒於邸震宇子晉璠字長佩爲諸生有學行舉鄉飲賓從子晉瑛字韜父敏慧過人孝事其父震震舉萬曆壬子鄉薦不二月卒年二十九

顧天寵字元錫鼎臣四世孫萬曆丙辰進士授盧氏知縣

盧地瘠民多輕生死輒詐言仇殺圖奸利天寵廉知其狀訟爲衰止號山伊水間多礦盜故有毛兵守之每督捕急盜愈熾天寵曰此卽守者自爲聲援有以激之耳令所在要害嚴防守不責其斬獲盜果息內艱服闋補遵化會天啟改元出帑金十萬犒邊士命天寵代關使申廷撰行邊故事帑犒至必貯庫照驗乃行吏緣爲奸天寵不更驗卽以散給將士歡踴及遼陽失守烽火燭天境內兵民錯雜情形叵測天寵靜以鎮之臺使者李瑾語天寵亦內顧否天寵曰守土之臣不得輕遣妻子爲民望瑾深賢之積考上上稍遷兵部主事告歸

陳岳如字魯瞻萬曆乙卯舉人選儀真教諭歷國子監博

士遷知冀州州例貢馬承役者輒破家屈如白兩臺改
官解地皆斥鹵不產鹽而有課又力請兩臺特疏題免
陞汾州府同知以冀舊事免官事白補歸德請告歸子
言先字敷功能文章蚤世覺先字躬乙 國朝順治丙
戌舉人青浦教諭言先子留更名永思字孝則亦以文
名康熙丁巳舉人江寧教諭

張魯得字宗自魯唯兄天啟乙丑進士授晉江知縣時鄭
芝龍未撫劉香諸寇方熾魯得簡精銳防布要衝又令
民什伍相保賊不敢窺伺減鹽課雜派萬餘金歲省供
億銀八千餘兩以艱歸補昌樂邑當山左孔道自己已
戒嚴後風塵多警魯得拊循有方境內安堵裁馬頭冗

費省倉夫供應銀廉平稱最卒於官兩邑並祀名宦子

立環字寰初崇禎己卯舉人曾孫慎行字桓如好蒐羅

文獻著歷朝孝行節義錄竹軒搜逸等書

松南志云魯得有孫峭字

眉山由粵歸道遇何兵備迫之入山妻以女何死統其
眾歸永明戊戌吳三桂給以內應要峭往至則勸以歸
順峭罵不絕口三桂醜殺之南中贈封爵諡忠武長子
思祖歸述如此今攷張氏家乘峭為魯傳孫松南志誤

張魯傳字宗在魯得弟崇禎中以貢授上海訓導遷知漕

縣城守有功調雩都會龍泉令蕭世澤不能禦流寇而

遁魯傳伺間往集紳民諭以大義撫循防禦邑得復完

遂兼攝龍泉乙酉陞廣西新寧知州丁亥五月薨髮檄

下魯傳杖殺檄使永明王召入粵遷祠祭員外改主客

進儀制郎中卒贈行太僕卿季子立藻饒膂力在粵西

時嘗揮戈力殲賊魁尋歸里城陷被殺未殊去爲僧孫其識字二非諸生清介有守工詩客遊三十載晚歸張浦故里以老鹵字述邵甫三歲父立光與母俱隨任新寧鹵與乳母留崑越四年立光夫婦溺死象州覓尸不得鹵聞號慟得疾遂不茹葷不衣帛不應試以終其身

國朝

○何訥字銘山一字公韓諸生爾昇子登順治乙未進士授太原推官爾昇書官箴十六字曰戴星視事指水明心官品一朝人品百代訥受而榜諸座平陽人有以被盜疑其叔者叔寃人無以自明其姪賄吏證成其罪憲府下訥覆讞得其實出之未幾獲真盜尋舉卓異以江

南奏銷注籍罷官久之起補保定知縣縣爲九江下流恒苦水潦康熙戊辰秋霑雨西山水溢築長隄百餘里夜馳馬墮水幾死民咸感泣畿內旗民雜處吏每抑民狗旗訥獨矯之設荆條以儆旗人之不率者邑賦額纔千七百金歲有逋欠訥乃以應入之羨代輸之內擢刑部主事移疾歸卒年八十一同年生王士正誌其墓

○余國柱字石臣先世天都人祖鄉飲賓大竣始遷邑之玉溪國柱登順治丁亥進士授餘姚知縣調咸寧固原總兵獲一僧人指爲勝國遺胄欲借以邀功并株連無辜高氏等數十人國柱知其枉向督撫力爭盡出諸獄給貲遣歸臨潼富室被劫胥吏妄指傭工爲盜有司不

官新兩縣總修志 卷二十五
察已擬大辟國柱覆勘廉得其情遂得釋擢刑部主事
歷遷郎中有侍衛數人元夕觀燈與長公主家人毆事
下刑部國柱鞫之侍衛服罪其黨中以蜚語并傷諸問
官國柱方考選督學被逮下獄及廷讞獨得赦歸子謙
字漢班幼善屬文工行草書以諸生入太學試授中書
康熙十三年奉 命隨順承郡王征吳三桂羽書殉午
磨盾草檄頃刻立就加分守道銜攝常德府事嘗作書
貽三桂開陳禍福勸其歸順三桂卒不省雲南平授鞏
昌府同知以浥爛茶篋事解任卒於客邸
○徐開遠字仲舒應聘孫崇禎十二年領順天鄉薦乙酉
城潰二子履慎履恒被殺執開遠及三子履愷縛西城

上愷大呼寔殺我勿傷我父忽大雨將卒皆避遂得自
城投水愷死而開遠脫走順治十六年授寶慶府推官
時戶口流散瘡痍滿目開遠招徠撫集請於旗帥嚴戢
駢兵以巡按株連被逮事白補汀州宜化山賊起屯踞
汀邵延平間開遠請會廣東江西兵進勦親冒矢石獲
其渠管踐禾等數十人而散其黨永定叠遭水旱米石
至三金請告糴江西減價平糴民懽呼載道建生祠祀
之以勞瘁卒履慎講學勵行危城中猶作顧成建死事
志季子王夏字允成諸生昭夏字純公康熙癸酉副貢
並以學行聞於時

○葉方恒字崑初重華次子順治戊戌進士授貴陽府推

官貴陽爲滇南門戶山箐阻深苗獠雜處方恒至墾荒
止訟招流亡安土著務與休息剏立陶戶以瓦代茅火
患得息以裁缺改知山東萊蕪縣裁節徵耗清供具驛
站窩逃之弊遷運河同知擢僉事分守濟寧卒於官

○孫灝如字宏先康熙壬子副貢授蕭縣教諭蕭自有明
以來無以科第顯者灝如集諸生得任觀瀛提命無間
寒暑遂成進士蕭士始知嚮學遷陽信知縣悉除一切
陋規尤樂造就士子所賞識曾繼英朱文龍李掌圓輩
十餘人歲時助膏火勉其力學後多有顯者會巡撫佛
倫與崑山徐氏修隙知灝如同鄉屢召問焉某某者同
聲謂居鄉素不識徐氏灝如獨抗言三君名滿天下職

與世好何敢諱遂遷怒借端劾罷灝如在任日每上臺
檄徵急輒捐資墊解聽民漸輸迨罷歸已解而民欠者
尚五百餘兩灝如盡焚其冊曰恐奸吏執此媚後官耳
有邑紳侯某子殺人欲灝如置寬典執不可絕迹公庭
數載及罷歸民遮道攀留侯某則前致謝曰能愛百姓
真好官也某敢以私廢公平又犯某坐法戍邊會赦還
聞灝如就道號泣裹糧追送千里曰所不忘者當發遣
時哀矜意切也旣歸家計蕭然杜門訓徒以終子倪城
○朱孝政字復旦德興子康熙壬子副貢充鑲黃旗教習
授知井陘縣縣有嚇鄉神廟廟前有溝土人於上元節
聚千人分溝爲界互相奮擊以勝負占吉凶死勿論孝

政嚴禁之毀其廟又有蒼巖山傳爲隋文帝女成道處
士民登山進香所投香錢以奉縣令孝政謝不納令充
賑卹孤貧之用居三載以廉勤著年七十五卒於家

○夏乾御字乘六康熙壬子領鄉薦授懷遠教諭外艱服
闋補江都奉委賑卹水災親按戶散給不假手胥吏諸
生程揚耀爲富商僕所毆朱珏爲縣尉役挫辱乾御皆
力伸士氣不畏強禦擢徽州教授徽鄉飲禮輒舉富豪
廣文率視爲利藪獨乾御執不可乞休歸卒乾御幼具
至性八歲時祖母陸病盲每五鼓以舌舐之得復明爲
教官訓諸生必以禮法上游多器重之

○葛匡世字貞侯歲貢生鑿孫登康熙辛未進士授湖南

零陵知縣邑自流寇蹂躪後孔有德駐兵城中糧絕人
相食幾盡經六十年元氣未復匡世下車後先禁革一
切陋規刊石爲令曰省民間一錢民間多一錢之用又
念徵輸時吏易因緣爲奸乃別立比簿視戶大小月分
三限不遣吏民爭先輸納尤加意作養士類新學校建
義塾飭士習嚴保甲戒包訟禁游惰朔望日必勤宣
上諭令人人通曉治零未久民愛戴如慈父母鐫其文
告條約曰實政錄移疾歸卒

朱而錡字信旃日燦孫康熙壬戌成進士授臨淄知縣
首以課農桑行保甲禁革私派嚴束隸胥爲務鄰邑吏
以偷兒充大盜移至臨淄謂可分功而錡曰此昧心事

吾不爲盜亦尋獲巨商行金求庇死辜而錡揭上臺寘之法察其親老爲請留養邑水災便宜發穀賑濟活民無算擢職方主事所司察八旗逃人按律平允捐俸贖鄉之鬻於旗者母憂服闋補刑部方受事疾作不起

○徐炯字章仲乾學次子樹穀弟登康熙壬戌進士授行人庚午典福建試擢工部主事遷員外晉刑部郎中父艱服闋補原官出爲山東提學僉事葺李攀龍白雪樓爲書院拔士之尤者肄業其中明諸生王曦如欲殉甲申之變至養母終自縊炯廉其事表之侍郎左懋第以使事死節命有司建祠以祀考最進參議假歸卜居郡城花谿築春暉堂迎母居之母喪服除補口北道調通

永遷直隸巡道尋罷歸弟樹屏字敬思康熙己丑中會試壬辰成進士授主事三遷至刑部廣西司郎中擢廣西提學僉事太平府土司向就附近州縣考試入學無常額西林縣無學宮亦無入學額樹屏上其事於制府奏請設學定額悉著爲令樹屏精藻鑑甄拔寒畯後多成名桂林相國陳宏謀其尤著者謝病歸卒年七十

○陸經遠字舒成先籍吳縣曾祖始居崑山經遠年十一而孤舅氏徐元文撫之曰此吾家魏舒也因以爲字康熙壬戌成進士知河南息縣訪民間疾苦廉得匪類悉置之法清釐鹽引捐墊逋賦已巳行取入京授御史巡視東城左遷國子監丞累官通政使經遠所至克舉其

職廉介自矢告歸卒貧甚戚族賻之乃得葬

○胡欽字表被甲桂孫溶時子少貧困績學工文補諸生後試輒冠軍康熙癸酉中副車七試京兆卒不售名益起選授直隸清豐知縣以經術節吏治學宮久圯以次葺治設義學七擇師主之立秋山書院以課士且各置產爲經久計邑多逃亡絕戶奸民輒隱占而鄰戶代賠爲一一釐出百年重困頓除治文牘從不假手胥吏內擢戶部員外郎遷工部郎中逾年通行甄別本司員外主事俱勒休惟欽獨留移疾歸卒年六十九

○周士字元友康熙庚辰進士授河南胙城知縣胙邑土瘠民貧士至戢蠹吏禁游惰勸耕桑有不便於民者白

大府汰之嘗捐俸贖鬻妻者於道又代孀婦贖質產以全孤寡歲旱蝗有諸生李克成妻生子不育訛傳產一旱魃里民合鄰境滑濬兩邑聚千人環其家以水沃婦頂曰澆旱魃克成奔告士親往詭語衆云爾等無張皇夜夢神告余禱諸孟化潭雨可致盍隨余往衆從之夜果大雨患遂息克成夫婦得全連攝陽武汲縣篆兩地民俱立碑通衢以誌德內難服闋補湖廣之宜章興文教理冤獄撫治民猺一以恩信註誤歸宦橐蕭然士夙以文名至是仍以教授生徒自給卒年七十二

○朱永字觀成鄉飲賓名佐孫登康熙戊子鄉薦由內閣中書授雲南永昌府同知甫下車見野多暴棺集耆民

勸諭速葬捐購隙地爲義冢其俗婚娶論財禮貧者多
愆期永諭之以禮自是婚嫁皆及時爲巡撫楊名時所
重檄署府事地多瘴民有瘋疾恐沽築輒生理之永令
患此症者悉舉報違者罪其子孫及地鄰其風遂革野
象蹂躪禾稼永爲文牒告土神象皆帖尾去永昌民爲
立生祠頌德罷歸卒

○唐德成字佑一十一世祖旺孫爲明初開國延安侯勝
宗弟自鳳陽徙居邑城北瀾漕里父爾平具幹濟才邑
中修葺學序清丈開河賑粥諸公務當事皆委任之德
成未冠遊庠康熙甲午領鄉薦四上公車得與明通榜
選和州學正見學宮傾圮設法興修刊

聖祖訓飭士子文及卧碑條約人給一冊徧飭諸生面諭
至再三課試擇其尤者飲食之以立品爲訓在和十五
年諸生無干憲牘者和士向調考滁州因紳士之謀力
請上臺創設考棚自是免跋涉之苦兩攝含山學篆嘗
奉中丞檄校文敬敷書院獎拔率成偉器癸亥奉部截
取選瀘溪知縣驗看時以年例改選江都教諭教士一
如在和時又五年告歸踰年卒年七十四

○王景獻字鶴隨喆生長子八歲卽能解經作墨銘登雍
正癸卯 恩科進士授廣西懷遠知縣甫抵任奉檄會
行團練先是令每出巡假公費苛索閭里或激怒苗獍
仇劫益熾景獻於馬前嚴飭賫牌去役毋許一毫派累

躬至各鄉鎮紳衿集處及犛獐所居宣示撫慰苗民歡
忭撰新詞吹蘆笙令苗女聯袂踏歌以頌攝融縣事縣
有鬻販婦女巨案涉柳城羅城凡三邑計七八十人丐
紳士居間行重賄求貸景獻怒斥之渠魁皆伏法以父
老乞養歸遂不復出生平邃於問學詩禮三傳九反覆
貫串焉孫岱字雲接諸生與從弟飛藻並以詩名

○劉澤乾字玉如少師事平湖陸隴其敦內行雍正間以
貢授旌德訓導廟宮通通衢泮池久淹澤乾爲設櫺星
門築圍墻歲終質傲裘以償工價旌俗俗三年則破櫺
別貯骨小棺以葬男女無別爲請於上立碑永禁邑
令周某以逋穀二千石下獄將死爲募償之更募金遺

其子以去爲諸生時歷試必冠儕偶在旌德問字者衆
闢地築舍之陶成甚多年八十卒於官

○顧濤字學山邑諸生康熙末循新例謁選授四川銅梁
知縣父艱服闋選河南宜陵聞邑患蝗蝻星馳赴任虔
禱邑廟已而大霧迷野三日蝗盡斃調石梁石梁故有
聚星書院明尚書邵寶所創歲久就圯濤修復之又經
晝膏火爲久計乾隆七年 廷議裁石梁復許州舊治
濤改補去任士民爲勒石頌德濤謝曰無庸此地五貞
祠後卽五貞墓不表識恐日久湮沒幸卽以此石爲之
改任貴州之印江攝玉屏篆有士人以事被黜察其枉
力昭雪之後得名調任普定有常平穀五萬餘舊例

每年易新貴出賤入以為利藪濤改為三年一易出入
 一準於平民苗大悅遷湖南辰州府同知致仕晚舉鄉
 飲卒年七十八子開基字震嶽恩貢生勳字重貽乾隆
 丙子鄉薦英山訓導工古今體詩兄弟同著稱於時
 ○唐瑩字叔宣德宜子乾隆戊午以副貢充景山教習授
 四川樂至知縣善聽斷民劉姓者控其女為翁吳某斥
 賣吳恐訟累倩邑紳居間瑩怒將置吳於法迨就訊知
 吳富而劉貧嚴鞫得劉匿女圖賴實情即令吳某當堂
 具狀領歸客民鍾姓控妻父楊某悔婚更字楊恃媒妁
 已亡力辨許字之女早夭鄰里同詞瑩見所存女與鍾
 年正相當而更字之夫年將及艾隔別嚴訊則年月聘

物互異乃斷令即日與鍾完婚值 王師討緬匪飭辦
 馬騾牛隻瑩慮常格給價易派累捐俸加價購求不數
 日而事集攝篆資陽值大旱走烈日中登山祈禱雨遂
 降遷江西九江同知左遷湖北歸州知州時 大兵進
 勦金川州當衝要瑩承辦驛務以勞瘁卒貧甚同僚資
 給之喪得歸瑩少濡染父兄之教工詩文在京邸從遊
 甚衆多顯達者子洪緒惇緒洪緒字襄周能詩領乾隆
 庚辰 恩科京兆薦官山東滕縣知縣有能聲惇緒字
 敘典嗣瑩兄球後官奉天司獄以長厚稱
 ○徐德裕字啟佑乾學孫樹敏子由監生應例授曲靖州
 判奉委清丈夷疆總督鄂爾泰稱其能陞烏蒙府鎮雄

知州時方改土歸流州府皆草創雍正八年秋祿萬福反破郡郡屬五其四已陷賊黨刷刀易租等嘯聚近山謀襲州城德裕令把總劉承印率兵出屯要口分所練鄉勇二百助之以所留二百人設伏於城東西而身率壯丁守城承印來告賊將乘夜劫營德裕撤所伏鄉勇并率壯丁人持兩炬前行賊遙望火光燭天謂援兵大至退走更選銳卒逐之遂獲刷刀父子及其黨數十州境大定錄功加三秩是年冬提督哈元生克復郡城制府檄德裕視篆旋改烏蒙爲昭通在郡八年繕城堡招流散烏蒙壤沃民不知藝稻募農師教之招迤東十郡無業之民資其食用使就耕開渠導龍洞山泉以灌田便汲初至之日石米直白金四兩迨去直僅二兩乾隆四年遷山東鹽運使坐同官事被劾事白厯准揚道副使陞湖南按察使暴疾卒

○俞雲耕字耕服廷棟從子父登瀛字紫臣師事朱立誠爲根柢之學事父允升以孝稱雲耕領雍正壬子鄉薦分校乙卯浙省鄉闈授廣東長寧知縣政尙慈恕獨於鬪狠不孝者不少寬縱建義學捐修脯不數月以外艱歸服闋補安徽之婺源縣令會哨向僅奉行故事雲耕必躬自督率終其任無劫掠巨案兩校童試拔程雋仙王佩葵等俱先後登科第母老乞歸以賠補倉穀傾其家授徒自給夙耽古學所撰述必有關世教醇茂得先

民矩獲子恩來字玉篆邑增生淳謹有父風

○葉鑒字道徽重華元孫貢生振珽孫登乾隆戊辰進士授四川萬縣知縣地當水陸衝奸宄竊發獄訟繁多鑒勤聽斷治事限以時日理官書不假手幕佐庭無留牘嘗雪部民林一俊之冤抵豪惡傅崇道之罪民大悅服以撥補邊餉事鐫秩尋復官補緜州之羅江禁暴止貪如治萬時罷官歸卒

○王鶚字瞻飛緝植孫入監謁選授泉州安海通判調臺灣之澎湖內外艱服闋補福寧攝龍巖州篆擢臺灣淡水同知淡水離郡二百里民番雜處隔一山卽生番時出剽掠鶚親抵番砦呼其酋長出宣示 朝廷威德委

曲開導酋長稽首聽命罽誤落職起補濟南同知嘗攝萊州府事萊故有儲倉餘穀三千餘石例入官橐鶚請悉以辦公陞知兗州府值山水衝發寧陽縣界有石梁口爲泰安東阿東平汶上衆流匯聚之處入汶河濟運梁口築埽防水水溢埽壞令適他出鶚率屬往督治不半月而埽口合失學士劉統勳巡視河工鶚備陳兗郡水利蓄洩之要頗採納之調知萊州以疾告歸卒子毓璘字瀛如河南試授府經歷若沂字登如乾隆丙午舉人試授河南知縣歷任息縣陳留商水魯山終孟津在魯山時值教匪煽亂邑非衝要地未設備旣而賊烽驟逼百姓皆惶遽若沂修城堡儲糗糧團鄉勇百姓避難

入城者若沂排衆議悉縱之入晝夜巡警衣不解帶者七日賊至見有備引去上游將薦之疾作卒於官

○王若常字心如鶚兄子以錢塘籍入貲授兵馬指揮歷光祿署正大理丞遷刑部員外郎擢知福寧府左遷山海關通判進薊州知州若常開敏有守精吏事在刑部平反冤抑爲尙書劉統勳所知守福寧日福鼎縣民林姓誣服人命論死若常訊得實改讞贖令執不可若常曰吾不能枉法庇一令卒釋之任薊州會時相營生墾於薊遣家奴劉姓督治劉要州官出迎誅求供帳若常堅不肯時相怒言於直隸總督將摭他事舉劾遂引疾罷既罷官貧不能治喪薊之民相率餽餉資之歸逾年

卒年六十三

○王葆元字寰中之醇從子父慤字受南少受學於長洲沈德潛工詩詞考授西安府經歷累署縣事性和厚饒幹濟攝令臨潼值歲稔格於例不得上達慤便宜令有力之家輸粟若干給以耆民頂帶民皆感頌乞歸久之卒葆元天資豁達入貲補大定府水城通判歷攝牧令篆制府吳達善素嚴厲獨才葆元有疑獄必令刺決大定所屬土神祠有田數頃安李二姓並執稱先業結訟數十年葆元馳勘地本川境改隸黔省時分撥熟苗安插安爲土著李則新撥葆元念當屬土著然無以服李佇想間見祠隅古鐘拂拭之則建祠捐田者果安姓也

案遂定時緬匪不靖黔省役苗民運餉至滇山路歧險
鞘多亡失葆元領運百萬乃請以鐵索連屬萬金十人
分負互爲牽掣全運以達上游嘉之檄所司遵行之遷
知威寧州以前任事牽連罷官值黔省鉛運期逼解州
鉛十萬水陸需費不貲巡撫以屬葆元葆元馳水城飲
苗衆酒告以故苗素德葆元集千夫歡呼願効力兼程
輦運費止數百而事已辦尋歸里卒年七十一

○李以謙字蘊山世望從子幼沈潛向學工詩文乾隆乙
卯舉鄉薦由覺羅教習授新泰知縣邑故瘠土以謙下
車卽卻陋規平穀價寬賦稅嚴禁胥隸下鄉民感之輸
將恐後有兄弟爭產而訟者爲懇切開導動以至情訟

遂解地有煤礦向以擾民封禁至是奸民藉以圖利釀
千金爲壽以謙拒而重懲之生平操守廉潔居官以刻
苦精勤自勵未二年以積勞疾作卒官子炳厚字彥群
以謙卒時尚幼卽力學自勵弱冠游庠旋食餼爲文沈
雄古健門下從游者百餘多知名士積餼貢太學取八
旗官學教習咸豐辛亥中北闈副榜教習期滿得浙江
知縣遞攝象山武義金華泰順桐鄉諸縣事泰順俗好
訟炳厚泄任清積案數百讞斷無冤濫嚴懲唆訟囹圄
爲空去官之日百姓遮道攀留遠至百里年七十卒於

杭州寓館

○徐樹閔字誠脩少宰秉義子年十三補諸生以貢謁選

授行人司司副改四川屏山縣知縣擢雲南霑益州知州歷任陸涼州趙州迷渡人李文富以人命株連甫抵任夜夢人訴寃及旦吏抱贖至文富獄也研鞫得實破械出之再擢景東府同知攝府事普思猥作亂屬邑恩樂被圍遣團兵援之城賴以全太和感通山水暴發衝沒劉官廠一帶檄攝大理府事至則相度形勢疏濬壅滯補塞缺漏起堰築圍水患既息賑卹流亡募民墾荒給以籽種仍請捐歲賦邑人立福民碑以誌德旋授開化府知府入覲還道卒子德懷字邦錫以貢選浙江麗水縣丞調補安徽貴池縣丞歷攝婺源青陽石埭貴池縣事昭雪寃獄士大夫繪披雲圖以贈薦爲鳳陽

府丞擢知靈璧縣縣當黃淮交滙多水災德懷勸戶賑給一不假手吏胥又疏濬水漑田萬頃出廉俸修新馬橋橋長二里爲九省通津商旅便之兼攝鳳陽府同知望吏議引疾歸卒德懷子傳一字道魯亦以貢選浙江知縣歷攝慶元黃巖蕭山蕭山勢豪爭沙械鬪案山積傳一至秉公清丈爭風遂息補東陽縣多逋賦吏因緣爲奸訪桀黠者治之民輸將恐後常平倉穀爲官胥乾沒每年派民買補傳一曰是額外征也籍公餘之舊入吏橐者買一萬八千餘石足其額勒碑禁挪用 文廟尊經閣久圯捐廉成之士知向學東陽民習其政愛如父母調任德清士大夫作叩留詞十章籲上官不得皆

攀轅洒泣而別德清水鄉多支河盜賊剽竊無虛日乃
修城闔柵水道躬自巡緝宵小滅跡擢知安徽廣德州
州多山田患旱虔禱輒得雨有與僧謀殺其從兄者以
賊告察其情不類於僧房得血衣遂吐實置之法積勞
卒於官

○徐德泰字大來御史樹敏子以貢考授縣丞入貲選湖
南來縣知縣兼攝衡山協擒永興逆案有功歲稔請以
常平所儲減價盡糶以違例罷任衡民感德爭還穀復
官授直隸清苑縣署清軍捕務丁外艱部以畿南首邑
難得人奪情留視事請以保定蓮蕪貳改皇華書院修
楊忠愍公祠擢知易州州在紫金關外來感廣冒地瘠

舊繁請照攤丁例以什之三四攤入田糧免厥戶之無
地征丁者民困頓甦會建 泰陵于州城西既成 謁
陵致祭諸務冗繁前後五年無懈無悞 行在賜克食
超授廣西思恩府知府遷江土寇羅天與跳梁大府命
爲監紀親冒矢石不兩月而事平攝右江道篆監試武
闈先是思恩命下以病越兩年始抵官吏部失其牘遂
以遲延被議未及去官而病卒

○徐寶符先名寶瑛又名詵玉後改今名字契芝父文奎
諸生謀置贍族義田不果寶符年十六纘成之中道光
庚子舉人甲辰考取景山官學漢教習謁選得廣東知
縣攝惠來普甯所至著政聲咸豐庚申攝陽江明年春

粵賊陷信宜屢犯境土寇乘機四起客民者川陝貧民
來山中種地積與土民絕其食鹽相仇殺寶符修城郭
繕器械團鄉勇數敗粵賊擒偽指揮溫正解及客民李
火子養誅通賊者何阿華林阿喜阮阿恒邑境大定先
是寶符與總兵某議餉不合上官兩詰之功遂不得叙
餉皆出私橐居五年去去之日縣民制袍以獻勒石序
功留生像于張太傅世祠焉時陽春罷考上官以寶符
得民心合之往果皆帖然竟以逋官錢留省不調越數
年攝潮之博羅有鄭氏兄弟械鬪事實符馳至鄉親解
之時已病積勞遂卒年七十工書畫弟璿字玉衡浙江
黃巖縣丞擒樂清土匪周胡二魁餘黨遂散後任甯波

府經歷卒於家寶符子允肅字孟恭附貢生入貲爲同
知亦工書畫性樸誠先寶符卒

○沈瑩字璞如崑山諸生援例入成均旋入貲得訓導性
誠樸敦內行父歿哀毀骨立奉養祖母不離側會避寇
氛待疾供湯葯衣不解帶祖母歿盡喪葬禮廬墓以居
同治初攝青浦司訓接諸生首飭端士行遴董修葺
文廟及文星閣倡捐助之監督工程始終不懈凡節烈
貞孝摻訪表彰集資設儒癯會至今行之越五年攝華
亭教諭著聲如青浦卒年四十八

崑山縣志續修合志卷二十六終

崑新兩縣續修合志卷二十六

儒林

隋

張冲字叔元梁零陵太守僧紹子仕陳為左中郎將非其好也乃覃思經典撰春秋義畧異於左氏七十餘事又喪服義孝經義論語義前漢音義凡數十卷官至濮王侍讀子後胤

宋

吳仁傑字斗南一字南英其先從洛陽來居崑山父信修武郎仁傑博洽經史有俊才講學朱子之門淳熙五年進士第歷羅田令國子學錄自號壺隱以詩文名一時

儒林

所著有古易兩漢刊誤補遺等書子樗

衛湜字正叔涇弟好古博學中鎖廳除太府寺丞將作少監皆不赴嘗集禮記諸家傳註為禮記集說寶慶二年上之直寶謨閣知袁州終朝散大夫學者稱櫟齋先生

明

魏校字子才崑山人其先本李姓居蘇州葑門之莊渠因自號莊渠宏治十八年成進士歷南京刑部郎中守備太監劉瑯藉劉瑾勢張甚或自判狀送法司莫敢抗者校直行己意無所徇改兵部郎中移疾歸嘉靖初起為廣東提學副使丁憂服闋補江西兵備副使累遷國子祭酒太常卿尋致仕校私淑胡居仁主敬之學而貫通

諸儒之說擇執尤精嘗與余祐論性畧曰天地者陰陽五行之本體也故理無不具人物之性皆出於天地然而人得其全物得其偏又曰古聖賢論性有二其一性與情對言此是性之本義直指此理而言其一性與習對言但取生字為義非性之所以得名蓋曰天所生為性人所為曰習耳先儒因性相近一語遂謂性兼氣質而言不知人性上下不可添一物纔着氣質便不得謂之性矣荀子論性惡揚子論性善惡混韓子論性有三品眾言淆亂必質之聖若謂夫子性相近一言正論性之所以得名則前後說皆不謬於聖人而孟子道性善反為一偏之論矣孟子見之分明故言之直捷但未言

性爲何物故荀揚韓諸儒得以其說亂之伊川一言以斷之曰性卽理也則諸說皆不攻自破矣所著有大學指歸六書精蘊卒諡恭簡唐順之王應電王敬臣皆其弟子明史校登進士時廷對擬第一上閱策有親宦官宮妾語置二甲授南京刑部主事與胡世寧李承勳余祐友善稱南都四君子每訊重囚必齋居默念凡有冤滯人不能決者片言決之會審監刑時慘然澹服竟日不御酒肉會江彬宸濠內外蓄逆乃移疾歸講學星溪之上從遊者常百人一日偶來溪上見天文四垂混混六合日星升沉雲霞舒卷覺乾端坤倪軒豁呈露其學大進自謂得之主靜提學廣東念入道者必自小學於是

飭社學聯師儒取士先德行不專以文詞嶺南俗尙巫鬼所在多淫祠悉改創以祀先儒曹溪有六祖道場達摩所傳衣鉢在焉碎而焚之嫉邪過嚴或思中傷之有劾河南提學蕭鳴鳳者併劾校已而南御史論兩人皆碩學不宜左調乃改鳴鳳廣東校河南上蔡有羲皇畫卦臺久廢有_三皇祠後混入佛氏校盡毀佛像闢中門表白太昊伏羲開天聖迹信陽宰子貢蔡人漆雕開向列鄉賢名宦改創書院祀之以司馬溫公謝上蔡_祠焉少林寺有達摩面壁像命有司毀之三月士習丕變擢大理寺少卿轉祭酒充經筵講官故事講官進講先期以講章呈政府校不可以師道自處請以賓禮見執

政張孚敬不悅遽改太常寺添注少卿進本寺卿時天地分祀之議興校因上郊祀論其畧曰禮家謂冬至祭天於南郊夏至祭地於北郊然考之周禮大宗伯以禋祀祀昊天上帝以血祭祀社稷初未嘗以地祇與昊天並稱宋儒胡宏考定古禮亦曰先王祭天於郊祭地於社而已初無南北郊之文故以社配郊則可以北郊配南郊則不可蓋地不可與天對夏至不可與冬至對聖人扶陽抑陰於一陽始生特重故曰復其見天地之心若有對是復見天心始見地心也臣每論學必推諸造化論造化必返諸身驗之天地渾然一氣正如我身止一主宰豈有兩節並行故知分祭之說非也但以天地

合祭比諸夫婦共牢始於王莽其說不經耳疏入不報致政歸當是時姚江王氏之學方張校雅不以爲然尤惡楊慈湖之說斥爲逆天誣聖之書更不欲人爲詞章之學惟教人涵泳仁體使和氣發生則邪氣自消大要在養之於靜而已嘗與裴大典書教其於公私義利之辨猛着精神當此人欲橫流之時壁立萬仞一毫污染不得蓋其自信如此沒後贈禮部侍郎

王應電字昭明受業於魏校篤好周禮謂周禮自宋以後胡宏季本各著書指摘其瑕釁至數十萬言而余壽翁吳澄則以爲冬官未嘗亡雜見於五官中而更次之近世何喬新陳鳳梧舒芬亦各以己意更定然此皆諸儒

之周禮也覃研十數載先求聖人之心溯斯禮之源次考天象之文原設官之意推五官離合之故見綱維統體之極因顯以探微因細而繹大成周禮傳詁數十卷以爲百世繼周而治必出於此嘉靖中家毀於兵燹流寓江西泰和以其書就正羅洪先洪先大服翰林陳昌積以師禮事之胡松撫江西刊行於世應電又研精字學據說文所載論謬甚者爲之訂正名曰同文備考卒於泰和昌積爲經紀其喪歸之崑山明史應電弟應宿字昭緯正德癸酉舉人從孫承慶字孟餘家奇窮依外大父范南江聞周易中庸論語要旨筆之爲文常驚一座舉萬曆乙酉鄉薦以祖母衰老遂不赴公車逾艾選授

瑞安知縣有惠政卒於官

歸有光字熙甫九歲能屬文弱冠盡通五經三史諸書師事同邑魏校嘉靖十九年舉鄉試八上春官不第徙居嘉定安亭江上讀書談道學徒常數百人稱爲震川先生四十四年始成進士授長興知縣用古教化爲治每聽訟引婦女兒童案前刺刺作吳語斷訖遣去不具獄大吏令不便輒寢閣不行有所擊斷直行已意大吏多惡之調順德通判專轄馬政明世進士爲令無遷倖者名爲遷實重抑之也隆慶四年大學士高拱趙貞吉雅知有光引爲南京太僕丞留掌內閣制敕房修世宗實錄卒官有光爲古文原本經術好太史公書得其神理

時王世貞主盟文壇有光力相砥排目爲庸妄巨子世貞大憾其後亦心折有光爲之讚曰千載有公繼韓歐陽余豈異趨久而自傷其推重如此有光制舉義湛深經術卓然成大家後德清胡友信與齊名世稱歸胡云明史有光先世元河南廉訪使德甫自郡徙崑山之項脊涇至明城武令鳳舉成化甲午鄉薦爲有光曾祖有光生時有虹自地起其光燭天因名幼時出見枯骨瘞而銘之父正以示其友吳中英中英大奇之十四補諸生當世廟時海內士大夫爭爲閱肆之文有光原本六經崇儒術屹然有述作之志嘗謂洪範亂於洛書易亂於河圖亂於河圖者執關朗九宮卦氣之說亂於洛書者

信漢儒緯候養生之書因作洪範傳易圖論二篇明聖人以天道治人無與乎數圖與書政不必相表裏學者信其言爭師尊之以覃恩選入太學乃渡河涉汶達洛泃觀大禹之迹攷禹貢循江之潯南入成均考明堂辟雍與諸生論禮樂作冠禮宗法二書上春官不第還講學安亭攷三江古迹謂太湖入海之道獨有吳淞江一路顧淞江細弱潮泥填淤漸就湮塞誠併力浚治使太湖之水東下餘水可不勞而治作三吳水利書將以濬東南財賦之源永利無害旣而海瑞巡撫應天頗採用其說吳中實蒙其利通判順德時順德故邢地而通判職隸太僕乃攷牧圉之法申明魯頌無邪之義作馬政

議援古証今賅洽精當書傳輦下執政者嗟賞久之隆慶庚午入賀罔卿命修馬政志尋陞南京太僕寺丞有光生平未嘗一日釋卷帙每著一書吳中英沈世麟張自新輩爭傳寶之謂有金石氣往來汶濟間甚久相度河源擬作漕渠書未就而卒士林惜之初四明余有丁隨父任來崑欲師事有光未果及嘉靖乙丑會試有丁爲房考得一卷古色闇淡喜曰必歸君也已而果然

王志堅字淑士一字弱生舉萬曆三十八年進士授南京兵部主事遷員外郎郎中暇日邀同舍郎爲讀史社撰讀史商語遷貴州提學僉事不赴乞侍養歸天啟二年起督浙江驛傳奔母喪歸崇禎四年復以僉事督湖廣

學政禮部推爲學政第一六年卒於官志堅通籍後卜居吳門古南園杜門却掃肆志讀書先經後史先史後子集讀經先箋疏而後辨論讀史先證據而後發明讀子則謂唐宋而後無子當取說家之有裨經史者補之讀集則定秦漢以後古文爲五編攷覈唐宋碑誌援史傳摭雜說以參覈其事之同異文之純駁作詩甚富自選止七十餘首弟志長亦深於經學明史志堅居官執法屹然所至守律令謝請託理冤抑問疾苦手削爰書雖老於文法者無以過在浙時議鹽法者欲行温州票鹽以佐餉議水利者欲盡墾諸壩客艘直達會城皆名美而實不便力陳不可而止督楚學時惇行崇禮以古學

化諸生竟以勤其官死年五十八子偲字元直性靜退
有孝行親沒後棄舉業專事古文詞晚參訂古今多所
纂輯如周禮義疏其尤著者志長字平仲崇禎庚午舉
於鄉庚辰中乙榜時有旨與甲榜同授官以不欲與躁
進者伍乃南歸志長篤志經學以易起家兼精三禮毛
詩嘗曰周禮儀禮文義古奧真聖人之書若禮記僅堪
爲二禮疏解耳乃刪輯二禮註疏附漢以後諸儒之說
名曰註疏刪翼又謂三百篇古註未可盡非乃以毛鄭
爲主凡說詩諸家搜羅殆遍作毛詩刪翼四易稿而戒
生平敦儉尚禮恥干謁當兄任楚學時有以千金屬僧
人媒致者志長峻卻之年七十九卒孫喆生別有傳

國朝

○顧炎武初名繼紳更名絳字忠清後改今名字寧人兵
部侍郎章志曾孫祖紹芳父同應紹芳弟紹帶生子同
吉未婚而夭聘王氏矢志養舅姑逾一紀炎武始生因
撫立之炎武幼負異姿書過目終身不忘年十四爲諸
生屢試不遇見明季紀綱法度凌夷廢弛遂屏去帖括
究心經世之業於制度得失生民利害取前史旁推互
證而折中於六經慨然以澄清爲己任甲申北都變聞
福王立南京薦授兵部司務未赴金陵失守崑城起義
時炎武奉母居常熟之語濂涇母先以貞節被旌及聞
城陷不食死遺命勿仕二姓明年唐王以兵部職方司

主事召母喪未葬不往順治乙未夏以叛奴事繫獄久之得釋遂去之山東自是歷游燕趙秦晉間每出以二馬二騾載書自隨輪蹄所經必諮詢其山川風俗古今沿革治亂之迹所至阨塞卽老兵退卒詢其究竟發書勘驗同異披尋搜討有一疑義反覆參考歸於至當有一獨見援古証今暢其說而後止康熙戊午 詔舉博學鴻辭廷臣爭欲薦之炎武以嗣母遺命馳書堅辭明年開明史館時炎武甥徐元文爲監修官發凡起例引据累朝事實出炎武酌定者爲多當時館閣名儒暨海內士大夫語及真實學問無不歛衽稱亭林先生亭林炎武自號也嘗五謁孝陵三謁天壽山十三陵四謁莊

烈攢宮惓惓故國之思終身如一日在華陰與友人王宏撰李因篤輩於雲臺觀側建朱子祠親爲上梁文以志嚮往壬戌正月九日卒於曲沃年七十炎武於學無所不通撰述亦最富所著日知錄積三十餘年而成於經義史學官方吏治財賦典禮輿地藝文之屬一一疏通源流考正誤謬於六書音義尤有獨得攷正古音韻爲音學五書大學士李光地以爲自漢晉以來所未有他如肇域志天下郡國利病書及左傳杜解補正諸書凡數十種並有功於學術世道生平恥爲文人嘗謂文須有益天下不貴多立言不在一時又謂近代文章全在摹倣卽使逼肖古人已非極詣况遺其神理得其皮

毛者乎故其所著述大抵主於歛華就實救弊扶衰絕
非詞章家所及也

○朱用純字致一節孝先生集璜子年十七補郡諸生甫
三載遭國變痛父殉難卽棄去自比王哀廬墓攀柏之
義號曰柏廬隱居教授資修脯養母覃精理學凡六經
四子濂洛關閩諸書及明儒薛胡高顧之論說辨析毫
釐知行並進而一以主敬爲程與長洲徐枋通家友善
屢以書問學有答枋書云聖賢之道不離乎事事物物
卽事事物物而道在卽事事物物而學在欲先得乎道
而後言學則離道與事物而二之亦析學與道而二之
矣朱子曰人須是學問思辨篤行然後可到易簡地位

若先以易簡存心便入異端惟卽事物而達簡易之理
故應天下之事接天下之物不覺其煩難若舍事物求
簡易則雖應一事接一物便覺煩難不勝紛錯聖賢之
學無過一敬敬猶長隄巨防滴水不漏敬之至也一敬
而天下之理得天下之能事畢變通鼓舞盡利盡神希
聖希天之學俱在於是用純於來學者必先授以小學
近思錄繼進之以四子書朔望宣講兼商榷經史又謂
古者士入學必釋菜於先師此禮不講久矣乃與生徒
倡行每歲孟春先期齋戒設先聖位倣丁祭儀而少殺
凡灌獻鳴贊命生徒各司之又患學者空言無實得作
輟講語反躬自責語尤痛切居平精神寧謚嚴以律躬

晨起謁家祠退卽莊誦孝經嘗用精楷手書數十本教學者置祭田修墓祭贍宗族恢復恭靖祠堂贖歸睢陽五老圖友愛諸弟白首無間遇事變斬然不撓自言識得天理熟當機立應如離弦之矢更不擬議更不矜張何思何慮行所無事康熙十八年或欲以博學鴻詞薦固辭乃免其後有司欲舉爲鄉飲賓亦弗應戊寅四月卒年七十二無子以弟之子導誠嗣方疾亟特命設先像扶起再拜顧弟子曰學問在性命事業在忠孝勉之言訖而逝門人私謚孝定先生

○諸士儼字莊甫崇禎間補諸生糾同志講蕺山證人譜研究性理闡發朱陸兩家之言多儒先所未及邑有大紳自知見擯公論願出金以周貧士有司頒及士儼士儼上書謝卻歷數紳罪國變後棄諸生隱居嘉定授徒自給所著遷改錄等書平湖陸隴其稱其刻厲過陳陸孜孜求合於帝天卒年八十同時朱汝礪字商石從嘉定黃淳耀遊殫心經學初淳耀有詩劄二卷未及成書汝礪做之會諸家之說而折衷焉亦名詩劄陸元輔稱其援据詳博議論精核可翼註疏大全之書又有禮辨十四篇多出新意發先儒所未發

○葉均禧字履成方藹孫淳子登康熙戊子順天鄉薦博學嗜古尤精於易十四歲時從同邑周耀學易得九圖大指後得華陰王宏撰周易圖說述益潛心商榷往來

京師兩浙間凡藏書之家暨通經宿老無不反覆研究
質疑辨難最後師事郡城楊无咎授三易卦位不同說
云說卦傳乾君坤藏章是歸藏易禮運謂之坤乾乃退
而求諸天地數知乾一從坤六氣甲己化土乾甲起一
卽甲坤己隔六納乙艮七從兌二氣庚乙化金艮庚歷
七納丙兌乙隔二納丁離八從坎三氣丙辛化水坎丙
歷三納戊離辛隔八納己與四同震九氣壬丁化木震
壬歷九納庚與丁隔四納辛中央五十戊癸化火卦周
而復乾戊歷五納壬坤癸隔十仍癸化氣有合如夫婦
納甲相得如兄弟夫婦胎育兄弟共體相得之象非納
甲五後數弗著也既復玩繹九宮數識用九用六之實

謂歸藏者陽卦各歸本象位而見數藏陰卦各歸本象
數而互位藏也坤固太陰之陰卦不歸本象位土水氣
火四元行地僅土水合球也所著易圖說積三十餘年
七易稿而成又輯 國朝以來崑山人物傳詳審無私
濫事蹟之散佚者實重賴之

卓行

漢

卞崇婁縣人桓帝時太守薛固爲法吏所枉下廷尉崇與
烏程錢讓詣闕稱寃廷尉囚崇等以兵圍守苦毒持之
崇讓怡然自若枉聲彌厲天子聞而奇之乃赦固罪

明

皇朝兩易通考

卷二十六

卓行

七

張傑字漢傑蕭墅人與子伯庸俱以豪俊稱傑爲元萬戶
府官吳元年松江錢鶴皋作亂遣人詣張請相結納爲
應傑父子毅然曰此叛賊也吾從汝叛耶大書叛賊粘
所遣人之背反繫其兩手叱之去張士誠據吳亦遣使
招傑共事謝不往後錢鶴皋被執大帥以松江民從亂
欲並屠之傑挺身見帥城中百姓賴以全

殷奎字孝章一字孝伯祖子諲自華亭徙崑山父庠處士
奎生數歲與盧熊同受小學長從楊維禎受春秋盛德
瑞受易篤志古學應浙江鄉舉不利廉僉李朮魯昱舉
主教席不赴至正丙申州治復有司聘奎訓導州學便
養母謁廟卽正配享位與知州費復初立賢守令鄉先

生二祠建劉龍洲墓祠奎割田三十六畝助祀事知州
倪侯斯翔婁侯廟修治先賢王葆李衡墓表節婦茅氏
葬郭翼顧權於馬鞍山陽皆奎所經畫洪武四年以薦
赴京師試高等例授州縣職母老請近地忤旨調咸陽
教諭邑甫罹兵革民未知學奎孳孳訓迪文教復興修
纂陝西圖經諸書在任四年念母不置作陳情詩讀者
悲之病卒年四十六門人私謚文懿先生奎文章原本
經術皆有關世故尤闡揚程朱之學力追往哲所著書
門人余熾編輯曰強哉先生集弟璧箕

孟忠字廷臣洪武初以賢才薦授武寧知縣革除後文皇
帝思高帝舊臣欲召用堅辭不赴賜敕嘉之以壽終

呂昭字克明性耿介博通經史洪武辛未以薦授徐州訓導上疏言民事稱旨改浦城縣丞縣多荒地昭捐俸市穀給無產者俾藝其地不責償自以穀少許種堂下有九穗者咸謂德政之徵永樂甲申超遷沁州知州父老醵金爲贈謝却之至杭無買舟錢抵家始得償在沁六年清操愈勵分校山西鄉試與修永樂大典子旦舉進士貽書戒之曰進士固佳居官不似吾廉非吾子也

呂旦字寅伯永樂丙戌進士甫釋褐奉命採木湖湘又督開平糧芻皆稱職以薦授河南僉事居官廉謹坐事繫長蘆十年免歸宣德初起建昌府推官歷兩考政聲益振以母老乞歸檢敝篋得其師林鐘所授詩經一卷拂

拭授徒及卒無以爲殮蕭山魏驥同邑王資買棺葬之朱泰安字士栗吉次子永樂三年領鄉薦明年中禮闈乙榜授內黃教諭其教學者以熟傳註敦行誼爲先丁丙外艱歷安仁安吉陽信三學造就士子甚衆再滿三考乞歸僦屋授徒人告以官府聲利事默如不聞間出訪太常夏景進士鄭文康或壺或奕或談前輩故實布袍蔬食處之怡然卒年九十三兄定安字士隆性高邁精楷法尤工古篆得周伯琦遺意嘗積其書草瘞之馬鞍山陽名篆塚弟永安字士常博學工詩爲文主性理善真草書年未五十卒卒後追號尚志先生侍郎葉盛嘗謂邑衣冠舊族必推朱氏泰安兄弟出處不同而清修

苦節並爲鄉里儀表永安子春夏春字日東性剛介以疾眇一目篤於孝友父母歿走三千里求父友學士高穀爲誌中年築室康宅授徒終老夏自有傳

孫惠字志德家磧溪永樂乙酉吳中大水仁宗在東宮命戶部以蘇松嘉湖四大府糧長之可備訪問者各一人來京惠以處士應召見時具以實對詔免四府租稅邑令芮翀坐事繫獄惠率耆老詣闕訟寃詞甚懇切得釋還任惠能詩尤精書法

黃鐸字希聲性耿介授徒自給題其座隅曰非公事不入縣門里中子弟從之學三日不授書但令正立必欲堅不動人或怪之曰讀書易耳爲人難苟坐立未當他何

望焉永樂丁酉舉於鄉未仕卒子琚字廷佩有文學次子玘字廷儀由賢良徵官至温州知府以捕盜著績

蔣明字奎章少孤力學舉永樂癸卯鄉試授慈利教諭宣德初奏元儒吳澄有功道學宜從祀孔廟上特從之明方嚴廉謹以道自高會臺使行縣陵轍官吏乃決意告歸注文公小學又考訂今昔作崑山志邑令鄭達刊行張經字伯緒博學嗜古登永樂甲辰進士時進士多遣歸就學既歸不樂仕宦教授鄉里張和兄弟項璉瞿泰安沈祥皆出其門嘗謂諸生曰人生切不可有嗜好若輩他日居官一有嗜好則吏胥僕隸惟是之窺矣年三十三卒子希賢亦以學行稱

龔詡字大章父訾謫戍五開衛詡甫三歲與母兄四人先
被逮既就道兄俱病死會赦東歸未久父死戍所詡從
母依外家王氏勾伍之牒旁午賴宗人保持之年十四
白母詣闕請補得遼陽建文帝憫之調守金川門燕兵
逼金川谷王穗開門降詡時年二十一奮戈擊之不中
見宮中火起乃大慟亡命變姓名王大章匿江陰常熟
間時聞追捕聲夜走任陽投馬陳二家二家義之匿之
大園中出藏書與讀几榻盡穿間夜渡婁省母旋賣藥
授徒二十餘年人固知之傷其志無告者宣德中詔寬
軍伍始得歸時周忱撫吳聞其賢具禮訪問便宜爲條
上二十事次第行之母卒詡已斑白悲號毀瘠久之忱

欲處以師儒之任兩薦爲松江太倉學官不就曰詡老
兵仕亦無害但恐負往日城門一慟耳因泣下忱歎息
而去晚築逸老菴瀟浦上歌咏自得成化三年年八十
八整衣誦大學首章而卒有白氣起屋上無子門人私
謚安節先生萬歷初詔錄遜國諸臣撫臣張佳胤疏請
建祠學宮西福王時贈檢討

章賢字士希以永樂庚子鄉薦授大理評事歷陞漢陽知
府致仕居官廉謹二十餘年始終一操旣免不能歸留
寓南京及卒鄰人賣所遺敝器殮之歸葬馬鞍山北麓
時以建昌推官呂旦中府都事朱昌與賢爲三廉吏裔
孫自闇字與可秀慧有文教諭沈應奎器重之早卒

朱昌字顯道厚重寡言幼從吉水蕭引之學春秋兼通三傳嘗謂經世之業必就古人痛癢處磨勘淨盡然後臨事有力由國子生授中府都事故事府幕取唯諾脩文具昌引經據傳務行其是僚幕忌之條府中事數十款難昌昌條對甚悉若素習者一府咸服告歸貧甚巡撫周忱清賦江南欲以羨畝五頃遺之辭不受曰無爲子孫累也既臥疾布袍舊籍盡鬻以供湯藥景泰五年卒卒後無以爲殮同邑王慶爲經紀喪事

鄭壬字有林宋龍圖學士大中十世孫南渡時舉族南遷後始徙崑山世爲帶下醫至壬祖子華及壬兄庚精儒術壬謹言笑不喜聞人過或以相告輒默然正容待之

事母孝母年高不能行作板輿與家人舁之往來家庭間如是者數年母意甚適迨歿治喪不作佛事歛含葬祭一依朱子禮兄亡無後事寡嫂如母嫁孤女不異己出重修世譜建葺祠堂必循禮制讀書務探義理尤喜談史於歷代世次年月人物姓氏歷歷指陳不遺詩宗少陵學行表於一鄉人稱雙松先生子文康

陳翊字孟佐少學易嘗就御史王從道問義正統甲子領鄉薦崑山士以易薦者自翊始明年登乙榜授膠州學正擢應山王府教授改陝西靖鹵衛學翊在膠靖廉靜爲務陶鑄人物不令逾度時有補救絕不使人知在應山以禮匡王王手書忠貞二字以賜念繼母老致仕既

歸有憐其貧而調之者翊頭面盡赤謝去年八十七卒
知縣張薰爲治後事四世孫王道字敬甫嘉靖乙丑進
士授鄭州知州調光州二州地溫民淳王道一意撫循
以上考擢工部員外視權南關商旅晏然謝政三十年
結社東林恤死存孤以厚德著鄉里

張翔字元龍父恒字士行號靜安嘗出貲修葺學宮翔性
耿介猝遇俗流輒引避之工詩精篆隸兼善寫生以薦
授江西按察司照磨歷知甌寧仙居二縣滄州同知瀘
州知州所至皆有德於民歸里後與主事孫瓊鵬詠弗
輟而動必以禮曰詩以達意酒以適情止矣沉酒酗德
非所欲聞子澤字宗恩以貢爲蘄縣訓導方嚴有儀度

鄭文康字時又王之子長身偉幹制行峻潔登正統戊辰
進士觀政大理寺聞父病請歸養未抵家而父亡母亦
尋卒遂不復仕日取羣經子史披閱雖病不少休就廬
闢館宏獎後進經誨導者多取科第好談忠孝節義表
善興賢闡幽弔古若嗜欲然冠婚喪祭一遵朱子家禮
暇則品劑草木全活不可殫紀與侍郎葉盛最厚善嘗
分盟出處曰吾經畧不及君表章先哲領袖後來庶幾
近之請以相與所爲詩文千首手自去取擇於時事有
勸懲者爲平橋稿十八卷子膏字山齡成化戊子舉人
吉水縣丞孫近仁字子充以貢官瑞州訓導有文行
周泰字存敬少從鄭文康受詩正統丁卯領鄉薦授烏程

訓導陞楚東安王府教授王二子異母同日生王愛少者序立稱謂皆先其長泰因修玉牒啟王曰殿下愛之耶故宜安之王知不可奪遂從其序以母老乞近地改諭宜與母卒服闋補蒙陰教諭二年致仕泰高介絕俗所居去縣治不十步絕不造令丞簿有不識面者子鄂字楚英以歲薦授廣西都司斷事其地險遠戍者多道亡都司輒械解者付獄多瘐死鄂請給文令還本貫追獲復解戍補而解者不累遠近德之擢萬州知州

王庭字元直檢討資從子天順壬午領鄉薦授陝西鄜州學正調高唐州遷國子學錄再遷潘王府長史卒庭孝友廉慎在郵時僦民田耕以自給諸生束修無所取律

身教人動以古道辛卯典江西試御史欲試諸考官定主試者庭曰考官若先就試是枉已求售也御史是其說卒用以主試爲長史王嘗命作崔徽負心論庭歛容曰此元稹浮淫假托之詞非庭所聞王改容謝之平生自負剛直百撓不回其學貴踐履不事辭章嘗曰徐孺子管幼安不聞能詩而世仰其名時以爲名言

朱旻字希仁璲子年十九領正統甲子鄉薦會試中乙榜授諸暨訓導歷浮梁遷昌平教諭天順末圍獵近郊前驅將逼陵寢旻在昌平上疏言天壽諸陵列聖神靈式臨法宜安靜而負羽之徒時有馳驟不無震搖上愕然戒有司勿獵著爲令調臨川石首兩縣教諭連主山東

河南陝西鄉試門人王約爲御史按吳立坊表之

朱萱字樹之性沉謹不苟言笑工詩善書法少與兄芹齋名先後登賢書天順八年萱登進士授大理寺評事奉職循理多平反而不爲法吏皦皦名嘗曰吾求不負此官事辦矣年輩有第望劣於萱而位出其右者衆或不平萱曰出處固有命耳畧無愠色以疾告歸卒

馮鈇字仲舉少孤力學每時祭悲感閭里領天順壬午鄉薦授永州東安教諭秩滿當奏績故事廣文受秋試聘得上考或勸少留鈇曰己及瓜而竟之如詭遇何竟以例左遷貴溪訓導嘗校文河南江西有權貴關說於鈇鈇唯唯事竣無驗謝之曰偶忘之耳尋卒於官子琨

張安甫字汝勉和兄子宏治庚戌進士授祁州知州平徭簡訟與民休息祁人士椎樸少文構洗心齋日與諸生講學於是始有登進士者母憂歸服除卽引疾乞休曰仕爲親養耳親今安在耶尙書馬文升嘉其靜退奏加四品服時年未五十也先業在橫塘鑿方池作亭其上自號天方性夷曠好登覽吳越名勝無不游游輒有題詠少嬰脾疾未艾卽絕欲茹淡年八十四卒子寰

陳汝翊字邦輔父奎字文瑞多隱德嘗盡焚逋券汝翊性敦孝友寡言笑重廉恥宏治辛酉領鄉薦久之遷桐鄉知縣桐號劇邑陳案山積汝翊刻日限月理之殆盡自奉廉謹卒於官監司郡守知其貧給舟歸其喪民號泣

送之子志道字子達嘉靖己酉舉人元城知縣

周瑞字應祥先世自元季岳州同知文彬從太倉徙崑山瑞其五世孫也博學工詩文試輒高等將受餼而亞瑞者其師也白御史請讓許之宏治中貢成均廷試第一授江西德興教諭檄攝縣事會桃源洞寇亂縣小苦供餉瑞調劑以時卒平巨寇謝官歸以詩酒自娛年九十四卒子京字君大以歲薦官雲南臨安府通判京曾孫汝礪字若金性木訥善屬文隆慶丁卯鄉試第一萬曆丁丑成進士官南京禮部主事陸鰲字伯載容孫正德辛巳進士自評事歷光祿寺丞性謹恪不爲營競中歲引退食貧嗜古所著駢伎錄易說

太僕周復俊稱其典質有原本卒年八十三

陸冕字宗周一字子端嘉靖癸未進士授禮部主事以劾方士陶仲文忤旨廷杖謫浮梁驛丞歸里杜門謝客種蔬教子非其分一毫不取仲文敗起爲浙江僉事遷陝西副使時西郵不靖冕立法鎮定遇大旱發粟賑濟全活無算秦民立祠祀之秩滿擬顯擢以病歸卒

徐一元字伯陽刑部主事申子以諸生入太學大學士嚴訥時官翰林延以教子值浙江倭亂後歲復大禋聞浙諸大猾勾引殺掠無虛日米價翔湧遍地瘡痍一元旦夕感額乃代草免漕疏三千餘言靜夜焚香默禱勸訥奏之得俞旨特減豁漕粟百萬東南之民賴再生焉尋

謁選得交河主簿治泊頭鎮鎮為南北水道衝一元免商稅卻河夫常例浚治漕渠又請於提學使即鎮南董子書院集諸生課之來學者踵至告歸卒

王執法字子欽受業於兄執禮領嘉靖辛酉鄉薦乙丑與兄同入禮闈執禮得末號臭穢不可處執法告監試以已坐相易執禮遂成進士既而官建寧執法杜門養母有閩客持千金祈居間建寧者峻卻之久之選授廣平府通判廣平多牧馬地職司俵價舊例有折價出納諸耗執法毫髮不取兩攝永年縣墾田建闡開義井為民永利遷建寧府同知即乞歸尚書廣平王世揚嘗語給事張棟曰生平所見廉吏如王別駕指不多屈也嘗買

田百畝議定而淫雨不止或謂天時如此且其人負課謝之可減值執法曰乘人之阨吾不忍也既三年呼田主以前田內數畝還之生平不喜諛墓之文臨終戒其子庚毋徵誌傳卒年七十五庚字子載性警敏以貢授於潛知縣廉平如父憂歸不復出築四懷樓與張大復薛學閔夏暉輩賦詩為樂年垂八十卒

徐子英字韜仲讀書能強記嘉靖壬子舉於鄉公車不第輒屏跡舊廬子維濂領萬曆己卯鄉薦迎子英新居與親舊周旋五日趣舟歸曰吾崑斗大城乃又另一世界耶吾既不能僕僕隨諸君即冠服奇衰相豔吾不欲觀之矣年七十餘讀書不輟赴京會試病不能入闈猶課

所試題不逾年卒維濂字道原萬曆己丑進士官刑部
主事上嘗籍一中使家或言有珍寶寄某下部追獲其
實誑也維濂據實以聞忤旨謫外後終職方員外郎
柴大履字旋父刑部主事太曾孫少孤貧不能從師每聞
村塾誦誦輒旁皇其側父執顧茂尹奇而館之令與諸
子遊中萬曆壬辰會試乙未成進士授中書舍人轉兵
部員外郎郎中丙午假歸暴卒大履嘗典試廣西便道
歸省時兄大觀貧不能自給出其裝進母以爲兄具在
職方久餽遺無所受歸里後有故弁以千金謁者峻拒
之甫別而沒沒後無半畝一椽又無子妻費孀居四十
年日織布一疋以自給終身未嘗服綵繒

龔邦衡字世美理元孫處士乾之孫十三能文章稍長占
二經從游者多取科第邦衡屢試不售學使者以非罪
黜兩生邦衡爭之力使者聲色俱厲邦衡愈侃侃卒得
白歲祿有暴吏攝縣事諸生白其事於上官以邦衡爲
首邦衡實未與謀也上官索主名繫之獄邦衡不置辨
明年提學御史耿定向行縣知其冤釋之仍廩學宮性
廉介不輕詣貴游中丞李憲卿家居時偶一過之憲卿
促柬報同列曰世美過我矣其見重如此家貧資脩脯
養親又時斥以贍弟卒年七十九歸有光銘其墓
龔時煥字德明邦衡從子砥行安貧好讀書搜訪遺帙手
抄口誦室隘不暇筐篋則架薄板爲複壁貯之摘刺朱

黃編無餘素有從之問難者原委顛末如數甲乙會有
詔寬革除之禁鬻產爲族祖詔建安節祠又白御史表
祖母周苦節又欲封植五世祖理之墓而顧視橐中如
洗矣當建祠時費不貲產盡則日售細靡零雜於市爲
胥伍設飲食卒年七十九

張維翰字宗翰祖誥父懋隆俱諸生維翰早有聲庠序萬
歷己卯以明經薦一試都門卽告詣南雍已而竟不赴
以扶持清議爲己任遇所不當意必正色規之雖貴要
人不避然任真獨行不參以喜怒涼燠當之者不怨也
縣令知其賢欲爲免役謝曰某免必及細戶夫孰非明
府子民耶族有悍者遇之素無禮後事敗令欲斃之維

翰力救得免生平工相人術往往奇中然不輕以告人
卒年六十二子大復六年

顧同應字仲從紹芳次子少工詩文兩中副榜以父日講
恩蔭國子生不踰年卒年四十三同應性卓犖恒業所
入輒以周戚執有所營辦則取諸假貸旣得而戚執輩
又徃徃分之至盡或訝之則曰彼所需又急於我耳歲
時伏臘必屈指某公逋某私逋計多寡贍給以爲常一
日忽歎曰此友人某先忌彼窘無以祭袖金徃贈之嘗
買田數畝或告曰是被誣需甚急緩之可令貶價同應
卽折券還之不責償仍爲言於邑宰直其誣卒之日戚
執哭之皆失聲子五緇絳紵纒繩細字遐篆貧勝於父

而好義似之天才俊逸世傳其兩京賦埒平子時務策
比長沙舉崇禎癸酉鄉薦年未四十卒絳紆別有傳纘
字子叟諸生死乙酉之難子洪善字達夫出後於緡登
國朝康熙丙辰進士官中書通曉清書精翻譯大僚
方擬薦之以疾卒年止四十

歸子慕字季思有光子萬厯辛卯年二十九以儒士補郡
諸生卽領是科鄉薦再試不第築室三江口曰陶菴圭
篋不完簷溜之外插亂棘爲籬植梅柳數株倚杖其下
先是子慕從京邸識嘉善吳志遠還過錫山因志遠識
高攀龍遂講求性命之學過從習靜端坐不語三人者
終日相對有得則欣然相語他人莫之知也家貧授徒

自給恒至不繼邑令王時熙學博沈應奎攜酒粟訪之
至門外不敢達聞諸鄰人從未受當事餽也性篤孝友
字孤姪如己子養其姊終身所著詩文清真澹雅如其
人病嘔血猶讀書不輟卒年四十四常熟合耿橘題其
墓曰清遠先生崇禎初有詔搜訪遺逸廣勵風節御史
祁彪佳以子慕應詔追贈翰林院待詔

沈堯封字觀瀾魯五世孫樂清縣丞大梁孫父宏慶字子
行以孝義聞鄉里堯封少聘於顧顧女病盲女之父請
辭婚堯封私請於父曰劉廷式何如人耶父喜爲之娶
萬厯間以貢選授安遠知縣子瓚字馨如天啟甲子舉
人由惠安教諭厯龍川知縣橫州知州終刑部主事

皇朝詞林傳 卷二十六
陳大同字裕所少通諸史明季見時事日非隱居教授究
心濂洛諸書以躬行爲務嘗語及門曰學聖工夫祇無
慚衾影四字最難崇禎初舉賢良不起甲申聞變頓足
一慟而絕子起鳳鼎革後棄諸生布衣素食以老

張元燦字光甫汝舟五世孫萬厯辛亥補諸生性狷潔終
身不至公府所居一椽不蔽風雨遇歲祲日不再火里
中巨室發廩周貧士擔粟至門元燦麾之去曰吾豈受
人憐者晷夜蚊蚋剝膚兒女啼泣有故人欲贈以帷念
其介且前且卻終不果母卒哀毀骨立或慰之則曰吾
母苦節四十餘年而吾困諸生無以顯揚又家貧奉養
無狀何以生爲因晝夜涕泣未幾病作竟不起年五十

六子圻字邑翼困苦勵學補郡諸生授餼聚徒講學門
下多令器里中諸善事力行不怠三舉鄉飲賓卒年八
十六弟希珪字尚公亦廩郡庠積學勵行並有父風
陳奇謨字君俞一字孝若陽羨當國附麗者立致通顯所
親招之往奇謨曰四海橫風大臣宜推誠布公尚懼不
濟而乃挾私任智以行之清流之禍復見於今吾恐國
祚亦將隨之也卒謝不往國變後屏跡江湖終其身三
十年未薙髮其見機持節如此奇謨爲諸生居甫里嘗
入城有附舟者遺其橐舟子欲匿之奇謨不可亟命追
之其人號泣而返曰某假親戚金珠在質庫今鬻田以
贖不遇仁人有外而已奇謨還之再拜而去

國朝

○諸永明字千如一字合甫壽賢從孫補嘉定諸生講求性命之學籍記海內鉅公於座右尤慕劉宗周黃道周之為人宗周有證人社永明奉行不倦北遊成均會道周下獄其鄉人涂仲吉疏救被杖就繫人遂莫敢通問永明治衣食炭藥潛遺之不以姓名告道周且怪且疑已知爲永明也邀見而慰遣之永明日吾慕先生道耳生死安足問言已相對哭爲邏者所覺遂留獄中執弟子禮從受周易久之獄解公卿間籍籍稱永明賢南都建兵部侍郎解學龍薦授翰林待詔永明日前從黃先生於獄豈以求官哉卒不就既遭世變稱方外士益研

窮劉黃兩家力行善事己亥夏病卒年僅四十六

○邱萬垓字開遠世居長洲陽城之夷林山至萬垓始遷崑山爲諸生豁達有大志不能干以非義授經邑中務究聖賢立言之旨不沿襲口語見明季時事日非未四十卽謝去儒冠家無擔石儲戚友困乏者苟有升斗必分給之與妻兄朱集璜最莫逆命子鍾仁師事之鍾仁試有司不利謂之曰人當務其大者遠者所望爾曹不在此也年七十二卒門人私謚尙志先生

○葉宏儒字豈凡一字岳心其先台州人永樂初始徙居安亭宏儒篤行好學弱冠補諸生爲童子師與朱集璜陶琰顧天達輩友善先道誼後文章風義凜然里中人

皆嚴憚之乙酉後棄諸生遜跡安亭舊居久之故人子弟邀致入城承其教者率成令器中年喪妻卽不娶少從姚江史孝咸講性命之學踐履篤實不以語言文字相高青浦令魏球邀修邑志以不入公府固辭球約第從局中見乃赴書成而歸後球過崑崙報謝則匿僧寺中辭之卒年五十七子漢

○王佐字鶴山以太倉籍補諸生少失怙事母能盡孝爲文原本經史諸子吐棄一切性高潔嘗下帷徐乾學家課其諸子不少假借或諷師範太嚴佐曰吾聞師嚴然後道尊未聞當爲貴遊貶道也會乾學將典試北闈承間微示以意佐不答退語人曰是誠愛我然守道者所

不爲也遂去之後復主乾學弟元文邸元文時有謗詢務盡直諒偶晨興見有赭色烏集屋脊感然曰此妖鳥也不利主家兼不利見者亟治喪歸元文旋罷相佐歸未幾亦卒子應泗字元魯博通經籍尤邃於易爲文典雅不屑趨向時習人謂其志行卓越無忝家風云

○王朱玉字元式父饒於財而玉所自出者微在襁褓母被遣稍長復喪父族衆利其所有搆摭姑嘍遂貧無立錫族兄曰俞憐而撫之復依其戚於青溪膠城間至爲人賃舂且舂且讀寒暑靡間補諸生領順治庚子鄉薦屢上春官不第補池州教授陞國子四門博士告歸清苦食貧足跡不至長吏庭族子有貧不能僦居者割己

屋處之晚客蕪湖遠卒所爲詩文抱痛蓼莪眷懷師友
鄉舉出新城王士正之門士正亟稱之

○葉方蔚字敷文重華少子生具特操居母憂三年不飲
酒食肉不居內撫叔兄方至之孤振珽恩義備至博覽
經籍肆力詩古文詞康熙戊午 詔舉博學鴻詞方蔚
預薦牘辭不赴時兄方恒官僉事方藹官禁廷俱以書
促之不得已就道計試期已逾乃抵京作啟以謝舉者
曰天下有有用之用有無用之用今士之不以奔競爲
事者寡矣其不輕進者當路君子宜務全之以示難進
易退之義亦無用之用也旣歸詠張季鷹司空表聖郭
林宗袁夏甫四賢詩郵寄兩兄諷其早賦遂初里中舉

行同善會建社倉育嬰堂皆力任其事以歲貢卒年六
十六子九齡字大年敦孝弟嚴取與由歲貢任太平訓
導九淵字希深諸生以詩名

○陳學洙字左原允升曾孫少孤事母孝與弟學泗相友
愛康熙甲子以吳縣籍舉順天鄉薦學洙績學有特操
妻劉早亡不再娶亦不蓄媵妾戊辰會試主司爲同里
人先期招學洙往行至中途忽自念曰吾生平未嘗有
私請老而失足可乎竟不往卒年八十二子璋字臨湘
登甲戌進士官翰林侍講學士督順天學政同時陳振
新字祉靖以諸生餼於庠生子女三人而妻卒時年甫
三十遂不復娶嘗館於富室主人有愛女少而美欲婿

振新力辭不可託故謝館他就終身未嘗以語人也

○王之垣字函三僑七世孫康熙癸酉領鄉薦授婺源教諭舉行紫陽遺規勵廉隅慎取與非公事期會不輕詣長吏諸生汪福等以公事忤縣令幾下獄之垣詣上臺請命令方遣其子就之垣塾之垣卻之爲令所搆以老疾罷歸發人士爲立教澤碑作亭覆之以詩文贈行者甚夥之垣性坦白爲文章簡淨有法度邑先達重其學行欲羅致之堅辭不往子淑京字道舒壬辰會魁授富川令遷知劍州改知眉州所至愛民能忘勢利卒於官

○張恕字令則羽之裔祖一宿遊京師嘗主應山楊漣邸舍漣疏劾魏忠賢死詔獄忠賢誦知疏出宿手并欲收

之宿走塞上以免後袁崇煥辟爲記室未幾辭歸城濱殉死恕生三歲卽知孝讓爲祖所鍾愛教以詩書過目成誦稍長泛濫經史百家屬文不起草補諸生貧甚友人葉李苞贈以良田五十畝辭曰道義交豈受憐憫者耶所著詩詞有素以付梓者其人暴卒散佚遂盡

○周夢顏字安士瑞八世孫父胡晉字望立嘉定籍諸生勵學敦行舉鄉飲賓夢顏稟承父訓讀書不隨時尙年四十二始補諸生生平以利濟爲懷念吳中浮賦爲民生累康熙己卯車駕南巡偕同志陸涪風等具疏赴行在跪奏交督臣張鵬翮查議會鵬翮奉命他往事遂寢夢顏復廣搜博採輯成財賦考一書大畧謂蘇

郡糧額在宋寶祐元年止二十八萬八千六百餘石至元延祐四年累增至八十八萬餘張士誠據吳加增宋元官田之數至一百萬石有奇明祖滅士誠抗拒日久遷怒吳民取其田照租簿起科加至二百十四萬餘成祖北遷加耗贈又增至二百七十萬宣德五年從巡撫周忱之請減去八十餘萬歷間加三餉復有二百三萬餘 國初時當軸者誤以前朝耗米作正米又以貴米之價折銀實徵二百四十五萬石詳列歷代之制并取累朝及 國初諸臣奏請蠲免浮糧疏稿繪圖銀板三易板而後行郵寄京師數百本冀達 宸聰至雍正三年奉 特恩減免蘇松浮糧四十五萬夢顏感激涕

零謂草莽書生自今死骨不腐矣當康熙時巡撫張伯行聞其名延致幕中以地方利弊相質問夢顏指陳得失悉心佐畫郡守陳鵬年亦極加優禮夢顏從未嘗干以私卒年八十四次子植字翼孫績學工文章年五十八始登乾隆乙丑進士授福建德化知縣培士氣警刁民未三年因公降調乞歸時邑中玉山書院落成兩邑令延主講席者三年又三年卒年七十七

○蔡廷傑字公旦由崇明徙邑之干墩及壯補諸生設教里中矢守清嚴其學務融會前儒箋故義疏兢兢以明聖學挽靡風爲己任謂學者雖歷困窮不可不激勵志氣嘗構丈室曰起亭作起亭說曰予初適淞南學者競

真宗皇帝集卷之二十六
三
尙華言飾行簡蔑禮法聖賢實學渺若河漢子乃大聲疾呼力拯其溺三十餘年狂瀾稍息人心風俗之正未必不由乎此也卒年七十一門人私謚恭定先生子璫字文翰謹身飭行一稟先訓教授生徒惟以立品讀書相勉以郡學生貢成均官舍山訓導多所造就閱五年乞歸卒門人青浦王昶記其臨終誠子文於湖海詩傳○朱叔鴻字弋青一字幼度新陽歲貢生少有志行補諸生連試高等名日噪家貧操行益堅太倉畢沅總督兩湖聞其名聘往幕下得交海內知名士若洪亮吉孫星衍其尤著者由是學識愈邃肆力爲古文詞性不干榮利畢沅平定苗匪幕僚皆得保舉問叔鴻欲得否答曰

未列戎行濫叨榮寵於心滋愧力辭不敢畢沅深器重之與友交直言規勸人有疑難事與商決以義而從違立判嘗修紹興府志去取秉公士論翕服在家時夜有偷兒爲僕獲舉大石將擊之急止之反婉言開導予錢二千勸改業小負販其居心仁厚類如此以明經需次廣文卒年七十二弟叔晃字次山諸生善漢隸蚤卒叔鴻子啟房字恪孫叔鴻工行楷書片紙隻字人爭以爲寶啟房能繼之少習柳誠懸書法城中有碧梧道院年十三爲書玉山積翠扁額吳縣顧莼見而異之歎爲風骨遒勁枉駕過訪許爲弟子啟房補諸生莼入詞垣郵寄楹聯書扇跋語有君書法已窺晉唐人堂奧蓋啟房

貞新兩縣續修志 卷二十六
自晉迄明碑帖靡不臨摹尤愛 國朝汪士鋐書稱其
善用退筆渾藏其鋒而秀在骨每仿之惟妙惟肖求書
者填門爲人清介有守不取非義財性伉直人有過輒
面斥之知之者咸欽其古道卒無怨言訓子義方粵西
盧本滄令新陽嘗謂人曰朱某立品清正神人共知不
獨書法可傳也其佩服如此

○胡照字映葵節愍甲桂四世孫曾祖溶時祖鏘父懌堂
俱以孝行稱懌堂力學敦志操入都考充文穎館膳錄
游募楚北憤恢復遠祖文定公墓田不成乃郵書辭家
不返時照年十三母朱惶駭不知所出訪求無耗照周
歲病幾瘳及愈兩足蹇每以不能遠道覓親爲憾屬友

作望雲圖自題長歌讀者悲之遂自號望雲少穎敏母
督課嚴稍怠舉父遺訓爲勗游新庠母卒毀幾滅性服
闋連試高等食餼自歎身殘不克進取專以承先誘後
爲務譽日隆徒日衆操持日益密先世墓在眞珠塢守
者盜賣控官得直祖父墓在張家涇盜伐宰木殆盡修
復之又置節愍祠田五十畝忠節祠餘屋爲族人私售
訴縣復其舊會邑修志錄先人忠義孝友節烈見史乘
及名人紀傳者送局表章兩從兄士杰士昌少孤時時
存問一孤姪樹蘭親課之俾成名暇取先正格言以於
律身教家者類編得十卷與俞某梓行惜字社廢弛舉
同志數人募貲購田三十六畝權息爲經久計創字藏

於碧梧道院曰崇文會惜字局道光十年二月卒年六

十六

崑新兩縣續修合志卷二十六終

